



M 66. 31<sup>d</sup>





110









# Auszlegung vnd

Leuterung etzlicher heyligenn geschribten / So dem menschen dienstlich vnd erschieszlich seint zu Christlichem lebē. kurtzlich berurth vnd angetzeichēt in den figur vnd schribten der wagen.

## In sonderheit.

Des creutzes / zu welchem vnser goth vnd herr / den menschen berufft.

## Bediengung vnd vorwort.

Romischer Christlicher Kirchen / wil ich in aller gutwilligkeit / alletzeit gewertig / gehorsam / vnd geuolgig sein. ¶ Lasze mich auch / ein kindt weyszenn. Doch lawts vnd inhalts heyliger schriefft. Der ich mich in eydes crafft verbunden / vnd mein pflicht / auff gemeindschafft vñ gelupt Christlicher Sacramenten betewrt hab.

*von*  
Zundorab Samlhardt.

1519.





Dem gestrengen vnd Ernubhesten hern Degen-  
hart Pfeffinger Ritter zc. vnd erbmarschalck  
in nider Bayern meinem groszgünstigen  
gonder vnd gebittenden hern.

**E**in gutwillig dienst vñ innig gebet tzuuor  
Ernubhester vnd gestrenger herr / groszgün-  
stiger fürderer. Ich hab offtmals betracht  
vnd warlich mit beschwerüg / das die vor-  
mueschsten Theoligen mich von rechtem vorstandt  
heiliger schriefften vorhindert vnd abgezogen habē  
vnd gar wenig / aber nichts / was Christus in seinen  
ausserwelten wircket / gelernet. Derhalben hab ich  
für gut geacht / das ich die iugent / die noch von ob-  
gemeltē lerern vngewasen ist vñ blasz / vleyssig warne  
vnd erinner yren vleysz vnd leben / nutzlicher antzule-  
gen / vñnd auch die yhne / so noch obgemelten lerern  
nachuolgig seint / etwan durch ein werck abfuren /  
vnd in die lauther schriefft gottis brengen mogt / fug-  
lich vñnd vnfügklich / wie sant Paulus spricht / mit  
schmagheit / mit bit / mit straff / in aller gedult. Dar-  
umb ich ein clare parabel / nemlich tzwen wagen er-  
dacht / vnd vnuorholn lassen außgeen / in trostlicher  
vom uthüg menschlicher das der sie sehen oder hore /  
wurd / solche wagen mitsampt yren strassen / pferdē  
vnd anhenghigen spruchen gnuglich ermessen / vñnd  
yren inhalt durchsuchen / auch entlich ersinnen das  
spruchlein des vndersten wagen / christlichem leben  
mer nachteylich vnd tzuuorhindernus / dan erschiesz  
lich. Vnd widerumb / wie schriefften des oberstē wa-  
gen den menschen tzu gots lob / reichtumb / ehr vnd  
glorien / vns auch domit menschlicher gebrechē / tor-  
heyten vnd sunden vormanen / vnd solten ye ergründt

Ursach ge-  
machter wa-  
gen.

wartzu schrif-  
ten beder wa-  
gen dienen.





vnd beschloffen haben/das glauben/lieb vnd vrtail  
got begehlicher ist vnd vnuorgleichlicher masszen  
hoher vnd besser/dan alle andere werck vnd vbung/  
sie seint sinlich oder geistlich des ewsserlichen oder  
innerlichen menschen. Dan keyn werck oder vbung/  
es sey vasten/beeten/wachen/singen/kasteyhung vñ  
dergleichen/wie es nomen hat oder haben mag be-  
hacht got/ es fliesz dann auß dem scharpffen engst-  
lichen vnd nidertruckendem vrtail/vnser eigener sun-  
den vnd mangels/die willicklich vnd vnwillicklich  
entsteen. Dartzu sol auch gemelt vrtail/des mensche  
lebē vnd wercks außwarten/vnd sollē heilig vbungē  
steetz quellen/vnd gerechtfertigt werden/in obange-  
tzeichter vorurteylung wan das geschicht/so kan der  
reich got den armen vñ betrengten sunder mit nichts  
ye vorlassen. Als der Prophet schreibet. Got sein  
volck nit vorlast/weil gerechtikeit in das vrtail wi-  
derkeret/dan als Job spricht/wie pintzē vnd wiesen  
an feuchtikeit nicht gruenen mugen. Also vnd vil  
weniger mugen lebendige vnd warhafftige werck/  
sonder ernstlich vnd bitter vrtail auffwachsen/ya  
wil ymantz got geuelligem dienst pflegen/der muß  
sich mit seinem vrtail seegen/in der summa. Alle got-  
tes absolutorien steen vñ sehen auff condemnatorien  
vnserer eigen vorbrechung gotlicher geboten/sie be-  
scheen nachlessicklicher oder tulicher fursetzlicher  
oder vnuormuglicher weis. Als der Apostel spricht/  
vorurteylen wir vns/so wirt vns got nit vorurteylen/  
widerüb entpfeldt ymantz vil gedachtem vrtail/so  
wurt er trostlos vnd vordierbt/als obgenanter Job  
sagt/ich werdt vor ym meine weg straffen/vnd so  
wurt er mein erloser werden. Item ab ich einfeltig  
bin/das selb ist meiner seel vnkuntlich/vñ Paulus

Math. xxiii.  
Luce. xi.

was das best  
vnd adelst im  
gesetz.

Nichts ist be-  
ser dan vnser  
scharpf vrtail

psal. lxxxv

A ij



Ursach gegen  
wertiger des  
claration.

Nota.

sagt/wiewol mir kein misstat wißlich ist/ ydoch bin  
ich nit vnschuldig. ¶ Zu vn̄ in solchem vorstandt/  
hab ich gotz diener fueren wollē/vn̄ darumb ein was  
gen lassen machen. Dieweil ich aber durch freunt/  
liche gonder vorstendiget/das wenig solche meinūg  
aus den schriefften des obersten wagē fassen konnē/  
vn̄ haben derhalbē ein erleuterung begert/ Hab ich  
mich schuldig erkant yrem angesinnen zu wilfarē/vn̄  
E. B. vor allē andern sondlichs vleis/als mei schirm/  
hern erkorē/dem ich obbegerte declaration zuschreib.  
nit in meinūg als solt ich mein kleyn vn̄ gering arbeyt  
Eurer B. wirdig vn̄ gemes achtē / sond mein dinest  
willig gemut damit antzutzeichen vnd wes ich mich  
guts/furderūg/radts/hulff/schutz/vn̄ vertheydigūg  
bey E B vorsehe /auch/dz ich zu gleich vn̄ recht Crist  
liches glaubē nicht anders beschirmpet werdt Bit E  
edele B dinstlicher demuth/wolle gemelte erklerung  
wie obberuert annhemē /vn̄ mich in hochstē vleisz be  
uoln̄ lassen sein. Das wil ich in emssiger arbeit vn̄ wil  
ligē gebeth altzeyt tzuuordynē bereyt vn̄ gehorsam sein  
Datū Wittēberg am Sonntag Letare im A. D. xix.  
lar. E. B. williger.

Endres Bodensteinn von Carolostadt  
Doctor vnn̄ Archidiacon̄ tzu Wittēbergk.

### Vorredt und eingauck.

Kurtz mel  
dung vn̄zers  
creutzs.

¶ Unser Creutz/begreiff̄t heilig leyden vnd frucht/  
bare werck/dartzu alles tun vn̄ lassen. So got behech  
lich ist/darumb sal keyner obgemelt creutz/tzu einem  
vn̄lebendigem holtz aber harten stein machenn/ader  
dar fur achten vn̄ halten. Auch sal nymants lessig vn̄  
sewmig sein/tzu wissen vn̄ tzu lernen/was sein eygen  
Creutz inhelt vn̄ beschleust/damit er nicht werdt als  
ein vnuernufftig pfert vnn̄ maul/welche verstand/  
los seynt. zc.



# Auflegung des creutz von seinem

oberstē teyl/bis an nydersten abgrund/der laut also.

**Goth lieb nicht umb lon. ym glau-**  
ben vnd hoffnung fron.

Dyser spruch ist wol durch Augustinū bewert/ist dis-  
ser sein verstädt/das man got/nicht/ymb leiplich od  
geistlich woltet sal liebē/sond vmb sein selbst gotheit/  
du salt got vmb all gutheitē dāck sagē/aber doch also/  
das du got auch libest/aper gleich sein gutheit/vō dir  
abtzeucht / liebstu got recht/so liebst yn vmb sust. Li-  
bestu goth warhafftig/so ist/got selbst/an alle mittel  
stracks gericht/vnd blos/dein lon/kein geschaffen-  
heit mit einblossen. Dyser verstandt vñ warheit/ist  
den yenen/zu wider/die das reich gotes/zu eygē nutz  
vorteyl vñ geferdet suchē/sprechēde/tzu kum vns dein  
reich/dan sie frewē sich/in ewickheit tzu regirē vnd her-  
schē mit got/als/soltē sie tzu d hochin vñ ampt/wirk-  
liches reichs auffgenōmē/vñ sond end/in wirgliche  
mitregirē/bleybē/ap sie soltē/bey sich selbst/gros ge-  
acht/vñ gehaldē werdē Das heyst nit mit got regirē  
sonder den stul mit Luciper aufftragē/vñ tieffer nyd/  
fallen. Dan im hochste vñ gotlichem reich wirstu dir  
selbst klein vñ veracht/vñ mogstu/in recht vernichtig  
keit dein selbst alhie kōmen/wurdestu warhafftig al-  
hie selig/vñ ein reich gots/dan wer got dient/d regy-  
ret mit im/als die kirch beth/vñ mit got regirē ist nit  
anders dan got dynen/im lebendigen vñ ewigē reich  
wurt im der mensch selber schnoth/vñ vorlaugēt sich  
in vergleychūg gotes/mit der vernufft/vñ mit vmentli-  
cher lieb/welche den seligē/aus sich selber in got furt  
vñ macht got allein gros/vñ almechtig/widerüb den  
menschē klein/vnmechtig/vñ ein ghorfamē dienstmā.

A liij

Hie merck dy  
historiē vom  
Canineyschē;  
weib Mathei  
xv.  
Aug. de ver.  
Apostoli.  
Mathei. vi.

Aug. 2tra Ju-  
li li. iij. c. liij.  
was dz reich  
gotes ist das  
wir biten.

Aug. vlt. c.  
Eygenschafft  
gotlicher lib.



Augustinus  
das heilth inn  
vil enden.

1. Corint. xv.

Apocal. xx.  
Augusti. de ci  
vi. dei. xx. ca.  
ix.  
1. Corint. xv.

Derhalben ich vilmals geschribē vnd gesagt/das  
hochste seylikēyt. Ist vnser hochste vnd volkum/  
lich gehorsamkēyt. Behorsam ist das reich gottes/  
das wir teglich biten/vnd hangt nit in außwircūg  
vnd eygem lust/sonder in einhorē/gewarnemen vnd  
volbrenzung gotliches willē. In der sum/wan got  
in allen gedancken/willē/worten/sehen/horē/vbun/  
gen vnd werckē/alle ding wurt also das wir in selber  
vnd allein ernstlich meynen/wie Paulus geschribē.  
Dan hat got sein reich in vns/wan du got leutter/  
lich behorsam wurst/an einigen eintracē vnd spann/  
leibs vnd seel/so tzukūment dir gotlich reich. Alhie  
kan der volkumlich gehorsam nit errecht werdē/dan  
vnser schalckhafftig vnd krank natur/sucht lystigkē/  
lich/dieplich/vnd slexnig/das yre in allem thun vn  
lassen/in bitterkēyt vnd sussigkēyt. Aber wan die selb  
be falsch naturlikēyt/in rumlichem Sig durch vn/  
sterblich affersteehung vberwunden/vnd wir dem  
toth honlich sagen werdē/O toth wo ist dein sig vn  
trumpff? wo ist dein dom vn stachel? so wurt Chri/  
stus sein reich/das es alhie in seinen außzerwelten/  
durch auffgelecht creutz/tzum teyl gehabt/seinem  
vatter libern vnd antworten/als dan werden sie allē  
got vnterdenig vnd gar gehorsam. Darumb weil vn/  
ser seligkeit/in vollem gehorsam steet/sol man got mit  
lieb/blosz vnd an mittel/vmb nichts anders willen/  
dan sein selbs eeren/loben/preysen vnd dienen. Vol  
get aus obertzelter betewdung/das diser spruch  
**Unsers willē selickeit:steet im an  
sehen vn gotheit:also rast der geyst  
spiritaliter:in geschaffenheit min?**



**principaliter** von vil brudern Barfueffer ordens/erbarlich vnnnd ritterlich angefochten ist vnd vorwundt.

Wie man aber got glauben vnd hoffenüg tzinsen sal/leret vns sant Paul. Du must glauben/das got so reich vnd mechtick ist/das er dir alles geben kan/das du tzimlich bitten magst/vnd yn dem gar keyn tzweifel habē/hiemit ist von noten/dein eygē armut vnd vnuermugenheit tzuermessen/so wurt dein hertz reyn durch obertzeltē glauben/den ein auch in gottes barmhertzikeit vnd mechtigkeyt auffhebt/das ander niderwurfft in vnser armut/gepresten/ellent/truebsal/leiden/traurikeit/sorg/not/angst/qual vñ greulich geschrey zu got. Beschichts auch das ymāts Franckheit oder Kleinheit seines glaubens/in obgemeltem bedrēng empfiert oder fūelt/der sol/wie yener(von dem Marcus im. ix. ca. schreibt) zu got hitz/iglich ruffen/mit bit sprechent. O herr kun meiner yngelaublicheit tzuhilff/vnd mit den Aposteln flelich beten. O herr/mein got erstat vnd gemeer mir mein glauben/vnd also sich selbst got/im soligem kampff/getreulich vnd vestiglich befehlen/vnd nicht vortzage dān mit gutten wercken erhebe sich disteln vñ dom/vnd begebē sich etzliche scheden/der du nicht gewar nemen kanst/sonder gotlich vormanung. Der heilig Abraham welches glauben die schriefft sonderlich vnd seer preyst/hat in hoffenüg/widerhoffnung got glaubet. Vnnnd als Hieronymus sagt/ Im glauben wenickeit vnd swacheit gehabt/wiewol Augustin⁹ nit vast genugsam obgenantē altuater/von tzweifelheit seines glaubens entschuldiget/kurtzhalben geschweichich/das die schriefft vnnnd Cyrillus vom glauben Moysi vnd Aaron geschriben.

Ro. iij.

Von vnserm glauben.  
Actum. xv.  
Zwey augen des glauben.

Marci. xi.

Luce. xvij.

Gene. iij.

Gene. xvij.

Roma. iij.  
Glaubē ist in hoffenung widerhoffenüg.

Rume. xx.



Matthaei. ix.

Matthaei. viij.  
Luce. viij.  
Marci. iij.

Danck du got/das er dich deiner gebrechē erinnert/  
vnd derhalbē vnrußig/sorgfeldig/vñ tzu sich rueffen  
macht. Bisz vñ sey du glaubhafftig/vnd bit das got  
dein Franckheit starck mach/vñ tzweyfel nicht an sei/  
ner barmhertzickeyt / dan dem glaubigen seint alle  
ding muglich. Christus vordert alwege den glaubē  
vor vnd darnach hielft er/vnd strafft alle tzeit wenig  
keyt vñ vngnugheit des glaubē eer/ dan er errettung  
gibt/nach dem vns Mattheus antzeigt. aber als Lu  
cas vnd Marcus die historien von den iungern/ so  
Christum im schless auffweckten / sich tzubehueten  
ersagē bald/nach getoner hilff vorweist er tzweyfel/  
heit vnd beschembt die kleinglaubigē. ¶ Mercke  
wan Christus hilff/so wurfft er dem mēschen we  
nickeyt seines glauben fuer zc. Von der hoffnung  
wurt tzufellig etwan in ein spruch gereth werden.

Laut des spruchs/den henden angehefft.

**Hendel der nacht: das ist heuch  
lerey in vleis vnd emßig vermeidt.  
Die pfeyl am tag fliehēde: das seint  
offentlich sturm: voruolung vnd  
betrubnus willigklich leydt.**

Wie bedarff man arbeyt/muhe vñ kunst/ auch wurt  
dem mēschen warhafftige gelassenheit angetzeit/die  
schrifft nent nicht allē aufferliche suppeesser vñ oren  
ploser/heuchler/sonder alles das ynn sich der mēsch  
betreucht/auffhebt/vñ ym selbs groß wurt/es be  
schech in tun od lassen/in leidē oder wirckē/in wortē  
oder werbē. ¶ Dieser schmechler od hēdeler gedach  
ter nacht ist vns wolbekant. vñnd la dich beduncken



gnant/der vns auch samptlich vnd sonderlich tzu  
gast gebeten/vnd mit seiner auszrichende speis erfult  
beuor die geistlichen. Der handel dieser nacht heyst  
nemlich/annēlickeit/wolgenollickeit/anflectlickeit/  
genugde vñ lust in guten werckē. Obgenanter wiert  
ladich dunckē hat sein sach vnd handel auch mit vol/  
genden namen gnant/mein vnd dein.

Annēlickeyt

Wein od dein

Item meinheit vnd deinheit/ich vnd du. Item vnser  
heit vnd icheit. Diese namen vnd ding/stiffte merck/  
lichen schaden vnd vorhindernus tzu rechtem leben/  
vnd souil vnd des mer schedlicher/das sie vorborgē/  
lich vnderschlauff des teufels seint/vnd das sie we/  
nig erlernen mugen.

¶ Wir solten got alle vnser  
werck aufftragen/tzureden/bekennen/tzuschreiben/  
vnd tzumessen/vñ alles das vns got gnedicklich vor/  
leyhet/nach seinem willē gelassen/vnd vns ye nichts  
anmassen oder annehmen/vnd in keiner gab kleben/  
dan als Augu. gelert/do ist ein seligs ich/wo nit ist

Augu. de off  
nen. ca. xij.

mein ich. vbi non ego: ibi felicius ego. wir sollen aller  
vnserer woltat vorgessen/vñ vbersich tzu got streckē/  
der heilig Paulus sprach/ Die gotlich gnad ist yn

Phil. ij.

mir/nit muessig gewest/ als solt er sagen / die gnad  
gots hat in mir gewircket/darumb als es baldt dar/  
nach gesagt / ich hab mer dan die andere Aposteln

1. Corint. xv.

gearbeyt/setzet er ane mittel dartzu/ia nit ich/sonder  
die gnad gots mit mir. Also solstu auch gelassen sein  
vnd gotlicher gutheit/in eygenschafft nit annemen/  
nit sprich ich hab gebet/oder deszgleichen werck ge/  
tan/sonder gots gnad/in oder mit mir/also bekenst

Gnad wirckt  
mit vns.

du den rechten werckmeister/der alle gute werck / vñ  
allen guten willē eingibt/vnd wie Ezechiel schreibt/  
der macht vns machen wircken/betē vnd wolthun.

Phil. ij.

Darumb sprach Paulus/ich leb/aber nit ich/son

Ezechi. xxxij.  
Gala. ij.

B



1 Corin. i.

wie annemlichkeit verdirbt.

Matth. v.

Luce. xxi.

Psal. ciiij.

1 Petri. v.

der Christus der lebet in mir. das ist. alles mein wol-  
leben ist / mit mein / sonder gots / dan Christus ist vn-  
ser leben / weiszheit vnd gerechtigkeit. Wan du in soligē  
lebendigē vnd warhafftigen aufftragē steest / so bistu  
gelassen / vnd liest geschehen / das got mit dir macht /  
nach seinem willen / also verdirbt dein icheit / dynheit  
meinheit / vñ entspreust das selig mein. Nu merck wā  
du got sein werck warhafftiglich bekonst / so kanstu  
nicht an leben vñnd bleybst yn allem vnglück frey le-  
dig vnd blos. Christ<sup>9</sup> vnser herr sagt das vnser werck  
also scheynē sollen / das menschen dergalbē / goth / mit  
vns / loben. Ach got wie fern seint wir von dyser gelas-  
senheit geflogen / welcher magt leydē / das yn nymāts  
lobt / welcher besteet yn innerlicher gedult / so ym ge-  
sagt wurd / du heist das gut nicht gethan / allein goth  
tuetes durch dich. ¶ Darumb sagt Christ<sup>9</sup> ir solt  
nit gros fürbetrachtūg habē / dan weiszheit wurt euch  
eingeben. Auch seint ir nicht die reden / sond der geist  
des vatters / der redt in euch / das ergrunde wol / so  
verleustu das dein / vñ kumst yn warhafftige gelassen-  
heit vñ verlassenheit / warumb wiltu das / got nit vor-  
lassen vnd gelassen / das stets sein bleibt vnd ist. Bes-  
war dich vor den vermuschten Theologen / dir lernē /  
das der mensch guter werck substätz macht. Als Ca-  
preolus leret / vnd die christglaubigen verfuert / das  
wilich / gefordert vñ verursacht / müdtlich vñ schrift-  
lich / wie sich das tzimet erhaltē vñ die Fogeln nicht  
scherwen. Dan ap sie mich gleych bosz scheldenn / sie  
waschen sich doch billich mit mir.

**In diesem lebē. habē wir ein nacht.**  
yn welcher die iung lawen / yr speis fresslich suchē / vñ  
der prummendte lawe vmbgeeth / ein tzuergreuffenn /  
den er verschlingt.



**I**n gemelter nacht / ist dem menschen nicht gefe-  
licher dan hoffart. Der teuffel merckt auff die woltes-  
ter / vnd wart eben / ab einer / benugde yn heiligen wer-  
cken hab. Item ab ymants do fuer halt / es het er ein  
gebot / ober gut werck / wolbracht vnd volendt.

Hoffart ein  
pestilētische  
sucht

Dan so baldt ein mensch / sich eines werckes erfrey-  
heit / gleich als solt er / die hoffart vberwundē vnd ny-  
dergetruckt haben / es baldt erhebt hoffart ir haubt /  
vnd spricht / ich leb yn dir / was frolokestu ? was triū-  
phirstu ? Vnd leeb darūb / dastu in meynen nacht tze-  
frug sigrummich bist. Von wegē des schedlichen vñ  
todlichē veindts / hoffart / het got auch seynen dyener  
mit gebrechē vnstuch gelassen. Darūb dz der mensch  
sein sunde / yn allen werckē notturfftiglich erweg / vnd  
sich / fur ein vnuttzē vñ geringen dienstmā / acht / vnd  
scheltē las / vñ behach sich nicht selbst / dan als Augu-  
stin<sup>9</sup> schreibt / nichts ist / dz dem mensche / gut werck /  
mechtiger abthuet vnd vernichtiget / dan wan ym der  
mensch selbst behagt / vñ ist eigenliche ein pestilentzi-  
sche sucht / der hendel so yn der nacht wandert / dā die  
Hebreyische warheit spricht also / vor der pestilētis dye  
ym finsternis wandert / behut er dich. Die giftige  
sundt / hoffart / wurfft yrn hals allein auff / aber dye  
and sundē / druckent nyß. Darūb spricht Asaph / erful  
deiner feindt angesicht / mit erloszigkeit / vñ sinagheyt  
belestige sie mit numlessikeit. so werdē sie / deinē namē  
suchē / beschem sie durch aus / vñ las sie verderben / so  
werdē sie versteen dz du got bist / aber hoffart kan got  
nit suchē. Darūb spricht Bernhard<sup>9</sup> / Es ist vil bes-  
ser ein gedemutigt erlosz weip / dan ein stoltz iūgt-  
fraw. D wye gar schliepfferig steet vnser fueß in dyser  
versuchūg. D wie cleglich vñ senylich gehabē sich die  
heiligē / last vns mit den pphetē alhie / in sondheit auff

Aug. de natu-  
ra z gratia c.  
xxxi:

Aug. ptra Ju-  
lia. li. iij. c. ij.

Luce. viij.

Aug. ptra Ju-  
lia. li. iij. c. iij.

Psal. lxxx.  
Alle sūde tru-  
ckē nyß alle  
hoffarth hebt  
auff.

Psal. lxxxij.

Psal. cxvij.



Psal.

schreibē. O herr hefft mein rechte hādt an das creutz  
durchschlag mich mit dem nagel deiner forcht / dan  
weil ich in deiner forcht vnd erkentnus stee meiner  
boszheit / so hab ich ein grawen vnd schawen vor mir  
selbst / vnd bit im geist also. Eripe me dñe ab homine  
malo. behuet mich vor ein boszen menschen / der ich  
bin also.

**Von eusserlicher herochlerey vnd**  
bedruch / ist besser tzedē vnd schreibē / dan von ob-  
ertzelter. Aber das ist war / eusserlich hinderlistigheit  
mag nit beschedigen / eer yinnerliche annemlickeyt /  
im hertzen auffsteigt.

**Endlich vnd beschlieslich ist uns**  
von noten / das wir in obgemelt vteyl treten.

Ecclesiā. viij.

Frucht vnser  
vteyls.

Josue. xvi.

Gregori⁹ yn  
Job li. iij. ca.  
xxv.

Die sunde vor  
hindern vnd  
schadē tzeitē  
nicht.

Judi. iij. z. iij

Dan dieweil das gestreng vteil vnsern miszhendes-  
lung / die sich in woltuen begeben / als geschribē. Es  
ist kein gerechter auff erdtreich / der woltuet vñ sun-  
diget nicht. Dardurch dan nit klein vorhinderūg vñ  
tzerruttūg im geist / den heiligē alhie entstandē sein /  
obleyt vnd anhangt / ist der mensch gotlicher gutig-  
keyt vnd vorgebung seiner sunden habhafft vnd vor-  
sichert. Darumb ist auch der Canineisch heid im  
mittel Ephraym ein tzinszman vnd reentpfleger ge-  
lassen. Nach dem Gregorius vns gelernet / das vnser  
gemut in höchsten vnd heilichstē wercken vnd vbun-  
gen / von sich selber schnot haltē vnd sich vorachtē sol /  
als dan wurt der Canineisch heidt (das ist) die sunde  
oder vnuolbrenghūg werden vnser gultman vñ tzins-  
bawr / vnd vns nicht schaden. ¶ Darumb wolte  
got habē vnd geboet das etzlich heidē tzwischen in-  
den lebē solten auff das er Israhelern sein erwelte /



durch die Heyden fürsichtig macht / vnd lernet / wie  
sie mit yren feinden streyten mochten / als das buch  
Judicum ynheld / **U**nszer lebenn / als Job sagt / ist  
ein ritterschafft / ein streitig vnd irrig leben. Der geist  
vnd fleisch seint gegen vnd mit eynander krigisch / vnd  
werden alhie nit gar befrid werden. Darumb ist es  
gut / das der mensch durch die sunde / die er nit mey-  
den vnd vmbgeen kan / wyder hoffart tzu fechten / vn-  
terweyft wert / seiner hauptmanschafft / dester nutzli-  
cher obtzusein. Derwegen / ist das / tzu fruchtbarliche  
auszganck / verordent / das wir den sunden nit mugen  
endrinen. Doch wisse das der nith wol tuet / der ist  
gebundē / vnd gefangen vom Teuffel / wer aber wol-  
tueth / vnd fleucht yn sein vtheil / der ist ein gestrenger  
Christlicher Ritter / vnser lebē ist die versuchung selbst  
vnd ein raupschieff / das anuelv vnd vberuallen wurd  
als Augustinus vnd Ambrosius sagen.

Job. vii.

Gala. v.

Sunde dye  
wir nit mey-  
den mugē.

Aufflosung  
verborgēdis-  
cher wördē.

Job

**N**un ist tzu redē von dem pfeyl der  
an tag / offentlich wyder dich geschossen wurd /  
wie du vnheimlich vnuolgung empfahen / vnd be-  
halten / auch deines veindts vnstimmigkeit prechen  
vnd dich mit ym gewinnen solt.

**D**ein vermeynt schedē. vnuolguig  
vnrecht / vnd gewaldt / szo dich erreychen / vbertzyhen  
betrengen / vnd mit grosser herszkrafft vnder sich notē  
saltu mit wolteten vergleichen / vnd das ist / ein sonder-  
lich got gemessigs werck / den genen / wol tzu thun / dye  
vns vnuolgen. Derhalbē spricht Ihesus. Ir solt vol-  
kōmen sein / als ewer hymelischer vatter vollkommen  
ist. Wiltu wissen wye das Christus meyndt / szo lyesz  
oder hoer seyn vorige worth / dye tzu dyser leer einfure

Abel saltu  
mit guth.  
betzalen.  
Mathei. v

B iij



wye & mēsch  
gotgmessige  
werck erlegt

Prover. xxv.

wie vns goth  
vnsrer besche  
digern zuhan  
den bringet

Schuldig ge  
horzam gen  
den obersten.

Ir solte ewer veindt lieben/vnd yenen so euch hassen  
wolthun/beeten fuer ewer veruolger/auff das ir soen  
werdet meines vatters/der ym hymmel ist/vñ macht  
sein Sonn den frummen vnd bosen scheynen/ regent  
vber gerechten vnd vngerechten vnd als Augustinus  
spricht/die veindt gotes/welche ir reichthumb vō got  
nit bitten/nements von nymants/dan von got/goth  
gibsts yn/also/sollen wyr vnsern wydersachern vñnd  
veruolgern dyenen vnd wol thun/vnd vnser wol tet/  
wissenlich/den wyderpellenden gebenn. Szo streckte  
sich die recht handt yn die lyncke/also/wye dan Sa  
lomon gelert/wan du dein hungerichen veindt spey/  
sest/vnd den durstigen/trenckest/wurstu auff seynem  
heubt kohn des fewers sammeln/das ist/als Ihero  
nymus geschribenn/wan du dein veruolger mit wol  
theet/vberwindest/wurdt er rewhich/vñnd ist ym  
sein vngestümigkeit leydt/vnd murt also/mit dem  
fewer/der lieb/auszgefocht/das er nicht meher/dir  
wyder gesein kan/also gibt dir Both/deyne vbel tet  
ter yn dein hendt. Dan dye kohn auff ym heubt/seint  
nach Augustini leering brennende seufftzen der rew.  
Dyse handt ist mit gedult an dz creutz durch geschla  
gen/vnd gewart alles vñfals vñ vertriesz/es erwachs  
aus wortten/wercken/raub vnd nam/yn fewer/  
wasser/lufft/erdtreich/oder von vnsern oberstenn/  
welchen wyr gehorsamkeit pflychtig/ap sye gleich vn  
ser wolff seynt/dan wan sie vns/was aufflegen/das  
gotlichen verbothen nit wyder ist/sollenn wyr yren  
willen volprengen/Aber wan sie etwas wyder goth  
furnemen/vñnd wollenn vnns tzu irem gesetz wyder



goth pynden/sollen wyr nicht allein vnsern Prelaten  
geystlich vnd weltlich/sonder auch vatter vnd mut-  
ter vngheorsam sein/dan yn solichem vall /ist ir ober-  
keit vnpundig vnd krafftlosz.

**Wan dir deyn oberster sagt. war-**  
umb verprengstu nit mein geboth. Antwort du /weye  
dich Bernhardus leert/mit Christo/Warumb vber  
schreydestu/das gotlich geboth mit deynem gesetz in  
dysen vall /tzymmeth dem vnderthanē / gegen dem  
obersten eyntzureden/als sant Paulus wyder Sancth  
Peter stundt/weye vns Augustin<sup>9</sup> berigt.

Matthel. xv.

**In yegklicher anfechtung. sal der**  
mensch des worts Sancth Jacobs eyndechtigk seyn  
welcher also spricht. Meyn bruder ir solts in alle froli-  
ckheit achten/vnd haltenn/wan ir yn manigfeltig ver-  
suchung einualdt/Keyn mensch sal erschreckenn/wan  
yn betrubsal/traurigkeit vnd quall vberrumpeln/dan  
wyr müssen durch anfechtung yn hymmel gehen/vnd  
sonder anfechtung wurt Keyner furfaren.

Jacobi. i.

Actus. xliij.

Wiewol der armen gedult/nith wurdet verderben yn  
ewigkeit/dannach ist vnser leyden/tzukunfftiger gots  
glorienn vngleich vnd nicht würdigk. Ich sag dir  
noch eyns/Keyn erschrecklicher vnd geferlicher dingk  
ist/dan das der mensch/sonder leyden/an veruolgüg  
lebet. Als Paulus sagt/Both geysfelt vnd strafft alle  
sein Soen vnd gelibten. Dye vnser got nicht strafft  
dye seindt nicht sein Kinder/derhalbenn saltu seyner

Aufflösung  
heymliches  
gegēwurffs.  
psal. ix.  
Roma. viij.

Hebre. xij.  
Eodem.



Gottes straff  
heusst aus bar  
mherzigkeit

Actuū. v.

There. xxx.

geyßzel begern yn armudt / yn hunger / yn durst / yn  
verspottung / yn verderblichenn leibs schadenn. Aber  
doch also / dastu dich deynes leyden vnwirdigk ma-  
chest / sonst mogt sich eyner gots son wirdig schatzen.  
Dye Aposteln giengen von dem Radt / vnd treiliche  
worten / der Juden / vnd erfreyden sich / das sie goth  
wirdiget / vmb den namen vsers hern Ihesu Chri-  
sti smacheit tzuleyden / vnd nenlosszig tzu werden.  
Der massen sal sich meniglicher / so betrengt wurd  
vnwirdig schatzen / das er / vmb gottes willen vernit-  
chtet vnd tzu spot hynfur werdenn sal / ya nicht alle in  
des leydens sich vnwirdigen / dzer tregt / als ein Chri-  
stglaubiger sonder auch alles des leydens / dz ym tzu-  
fellig / verschuldt / ader seynes bedunckes vnuerschuld-  
fuerfelt / dan got d wurfft darumb nyder / das er dar-  
nach auff heb / nach dem Iheremias schreybt / Ich  
werde dich casteyhen / vnd dan wurd mich dein er-  
barmen. Item. Hat dich goth verechtlich abgesetzt /  
So wurd er sich nach dem hauffen / seiner barmher-  
tzigkeit vber dich erbarmen.

**A** Belestigung vnd veruolgung / peyn vnd qualung /  
lernen vns nach vnsern verhandlung / trachten. Dar-  
umb einfurung gotlicher straff / aus barmherzikeit  
vnd gnaden kumpt / derhalbenn sol ein yetzlicher sich  
vetterlicher hymnellischer staupen vnwirdigen halde  
vn sie gutwilligklich annemē. Aber vns ist / dises vals  
weye den iungen kindern / szo den willen / ires vatters  
noch nith verstehen mugen. Wan der vatter seyn kind  
lein mith ruden streicht / baldt argkweneth es seynes  
vatters tzorn / vnd verdeneckt vetterliche casteyung /  
welche ym tzum beestenn erschewste / als eyn fremb-  
de / stiffvetterliche / abgustinge straff / also ist vnns  
wan vns Goth beleydiget. Darumb spricht Esaias



Sein werck ist ein fremde werck / auff das er sein  
werck volende. Got macht alle fremde werck / vmb  
willen seines eygen wercks / dan veration / anfechtüg  
vnd vmbtreibüg gibt ein vorstandt vnd macht vor-  
nemen. ¶ Fremde gots werck seint / zorn nider-  
trucken / voruolgē / erschrecken / engstigen / betrengen /  
vorwundē / vnd der gleichen. Eygen gots werck er-  
bannē / woltunen / retten / auffheben / erlosen / gesundt  
machen / vnd endlich behalten / obertzeltē fremde  
werck bescheen von wegē der barmhertzigē gutheit /  
vnd kumbt vilmals das der mēsch in fremde werckē  
got naher ist / vñ recht wol erhört / aber er befindt kein  
erhörüg. Derhalbē sagt Job / got erhört mich schrey-  
henden / aber ich glaub nit das er mich erhört hab /  
Dan er vberschut vnd erfult mich mit bitterkeyt /  
vnd lest meinen geyst nicht ruhen. Das ist vil heiligē  
alhie begegnet / das sie von der grossen verr wegen /  
welche sie tzu got gehabt / nit gewist habē ob yn got  
gnedig gewest oder nit. Als Dauid sich beclagt / ich  
bin deiner vorgessenheit gegeben / als einer der von  
vñ auß deinem hertze abgestorben ist / gleich als wer  
ich gar auß deinem gedechtnus außgeraufft / vñ hast  
mich wie ein verloren vass gemacht. Liorach der pro-  
phet spricht / Ich bin vorgeleicht den yenen die abstei-  
gen yn die hell / der du nicht mer gedenckest / vnd die  
von deiner hand abgeschnidē seint / du hast mich ge-  
legt in die vnderste grubē / vñ dein grüngen zorn wis-  
der mich befestiget vñ gepeiniget mit aller voruolgüg  
das ist ein leidē das nymantz vornymbt / er lese dan  
vil propheten / vñ hab auffachtung wue sie got hingel-  
woffen / vñ wie schmerzlich sie tzu got geruffen. Ich  
hette wol lust ein eygē buchlein dauon tzuschreiben /  
dan wer gedacht anfechtüg nit vorstert / der wurt we

Esa. eodem

Fremde vñ  
eygen werck  
gottes.

Job. ix.

psal. xxx.

psal. lxxxv.



Scherffts  
leyden.

nig Prophetē recht vñ wol lesen od hore. Aber kurtz-  
lich findt ich yn gemeltē vñ anderē heyligē lerern / das  
die grost straff / vñ vnertraglichts leyde / dz dem men-  
schen hie auff erdtreich anspringen vnd durch stechen  
magt / end sprewt doher / das sich die heyligen / selber  
bekennē geferet vñ gescheyde von got / das ist gewisz-  
lich ein hellisch / smertzlich / bitterlich vñ vntzellig  
pein. ¶ Nicht ist den Prophetē vnleydlicher gewest /  
dan das sie etwan / mit anfechtug dohin vnd also ge-  
stossen seint / das sie nit anders gewist haben vñnd be-  
fandt / dan das got vberfern von yn abgesundert vnd  
gefert / vñ sie solten vñ wolten got von grund / meynē  
loben vnd lieben. Aber do sie yn sich selber sahen /  
befunden sie sich / liblosz / lobledig vnd gnadlosz. Dar-  
umb vylen sie yn ein greulich clag / vnd trieffende ge-  
schrey / vber sich selber / vnd versenckten sich / do mit in  
die hell / yn die grubē der still schweyger gotlichs lobs  
vnd stundt alles vngluck wyder sie auff dz ye wurd.

**In ytz gedachter hell vñnd feuri-**  
chem pfeil bedorffen wir starcker vnd grosser gedult.  
Aber nymants sal vertzweyffeln / wan ym / yn lettzen  
tzen / anfechter der hell antasten / vnd vmbgeben yn  
mit schmertzen des todts / dan got furt den menschen  
yn die hell / vmb sein auszure. Obgemelt hell / oder vn-  
seglich last des anfechten / macht den versenckten men-  
schen tzu got schrayhen / als vns der Prophet versten-  
diget / sprechende / die strick od schmertzen des todts /  
habē mich vmbgebē / vñ die beleydiger aber gefertig-  
keiten der hell habē mich vmbbringelt. Ich hab angst  
vnd schmertzen gefunden / vnd den namen gots ange-  
ruffen. O got mein gutiger got mache mein seel ledig /  
fur mein seel aus dyser hell / nit verlasz mein seel in dy-

Begewertig  
hell macht zu  
got ruffen.  
Psal. cxv.

Psal. cxli.



ser hell. nit gib tzu sehe verderbnus / gib mir leichttrüg  
vnd linderüg / dan keyner kan / yn soligē hellischē anfe  
chtunge / dir bekennē. Endlestige vñ endbinde mich  
von hellischē bandē / so kan ich dir gros lobē gebē. als  
geschribē stehet. Du salt mich anruffen / ym tag dey  
ner anfechtüg vñ betrubtnus / So werde ich dich er  
losen / vnd von deynen engsten frey machen. Als dan  
wurstu mich gros loben / mir gloxen geben / vnd fro  
lich singen / er ist mein erloser / mein zuflucht / mein ge  
dult / mein gloxen / Christus ist mir auffgestanden /  
mein vbung ist itzunder ym hymel / do Christus / an  
der gerechten seines vatters / sittzet. Das ist der wege  
von dem Asaph gesagt. Opffer des lobs eret vñ preyst  
mich / vñnd da ist der wege / yn welchem / ich mein se  
ligmacher tzeige. Aller grawhen / ist den heyligen der  
halben tzu kömen / das ynen got in obbemelter hellis  
cher pein / sein angesicht / der lib vnd gnaden entzo  
gen / vnd veruernet hat / dan so bald sie das verlyssen /  
steen sie / ym geruff / Wye David singende / baldt ey  
ling erhor mich mein herr / mein geist nympt ab / nit  
verbirg dein angesicht vor mir / sonste werdt ich den  
yenen / so in die hell absteygen / vergleicht. Nun merck  
was das creutz inhelt / vnd was wir aus ym lernen /  
ap nit einer billich sagen mogt. Ich bedarff keyner  
kunst / dan des creutz Christi dz mir Christ<sup>o</sup> auflegt  
es sey vern vō mir / dz mich eins and dan des creutzs  
Christi berume. Ergrunde vñ ermisse / wie maniguel  
dig betrubtnus / des mēschē wardet / vñ verkündschafft  
wud mēsch blossz weyth vñ vngewappendt ist / weyl  
aber alles / den mēschē zugut / vñ tzu stuchtbarlichem  
endt / diendt / sal man got yn demutikeit danck sagen /  
vñnd der gedulth / nit dem yrteyl gewar nemenn /  
Als Oseas sagt / In irer peinlichkeit vñ wydwertikeit

psal. vi.

philippē. iij.

psal. xlix.

psal. cxlij.

psal. cxlij.

Ephe. iij.

Gala. vi.

ose. vi.



Psal. lxxij.

werdē sie tzu fruber tagzeit auffstēen/an mich tzuflie  
hen. Widerumb die nit mit vbel vñ kummernuß be/  
swert/die seint alle feyst vñ starck gots gebet tzu vber/  
farē. Als geschribē/Sie seint nit in arbeitē der men/  
schen/vñ werdē nit mit ynen gegeischelt oder gefles/  
gelt. Darumb hatt sie haffart gehalten/sie sein bedeckt  
mit schalckheit vñ vngutickeyt/vñ ist die boszheit aus/  
yn als auß feystickeyt furgangē/vñ seint in begirlich/  
keyt yres hertzens eingangē. Sich ob nit der teufel  
mit allen seinen sachweldern bey dem vngetreschē vñ  
vnbekūmerten mēschē stat hab. Dyrūb sol der mēsch  
erschreckē/wañ er sonder vmbtreibūg lebet. Jedoch  
wañ du hochste gedultickeit entpfindest/mustu fleu/  
nig in warhafftig vrtēyl kēren.

Roma. v.

1. Corint. xv.

Lantt. viij.

Roma. viij.

**Ich solte von der lieb gottes auch**  
was schreibē/aber diese vorgennē arbeit ist tzu ey/  
nich vnd klein/yedoch soltu diese vorgēd artickel ein/  
nemen. Lieb steet nicht in vnsern kressstē vñ vormu/  
gen/als etzliche cappen geschribē/sonder ist ein gab  
gots durch den heiligē geist/in vnserē hertze gegossen  
Lieb gottes hat ein widerarth gegē vnser natur/dañ  
vnserē natur begert das yr wie obgemelt. Aber die  
lyb gots suchet nicht das ir/vñ fuert den mēschē vber  
sich in gotlichē willen/vñ ist so mechtick/das sie vil  
wasser nit anzleschē können. Die wasser erkleret vns  
sant Pauls sagēde/wer wurt vns von der lieb gots  
entziehē vñ frocht welches wasser? ob anfechtung?  
ob betrubtnus oder angst/ob hūger oder das swert  
vñ antwort/ich bin gewisz vñ sicher/das vns weder  
todt noch nodt/noch eyn creatur von der lieb gots  
abtzeucht.

**Gotliche lieb ist ein anfaherin vñ**



hät haberin / aller obertzelter gots gabē. wu sie nicht  
ist / do ist kein ledendig glawb. keyn bestendig hoff-  
nung / keyn lawttere demutigkeit vñ gelassenheit / kein  
warhafftig gedult / vñ kein ernstlich vrteyl / dz leret vns  
S. Paul<sup>o</sup> / also sprechēdt. lieb gots gelawbt vñ hoffet  
alle ding / so horestu den titel. Nw bedencē d glassen-  
heidt / rechter handt / Die lieb gots sucht nicht das  
ire / sie wirdt nit auffgeblasen / Sie ist nit hoffartig /  
aber wie die lieb gedult liencer hand vnderheolt / les-  
ret vns obgnanter Apostel. lieb gots wirdt nicht ge-  
retzet. gedenck nit vbel / gibt nymanst bos / für bos /  
Beschlißlich die lieb ist edeler dan keyn gab. dis ist  
gesacht von titel / die in grund gotlichesz willēs sichet  
vñ auch vō der preyt des Creutz. welches vns Chri-  
tus gebewt / antzunemē / das kein gewaldt ader obir-  
keyt abnemen kann.

i Corin. xliij.

Leng des creutz hat dyse ler yn sich.

**Dem Teufel und welt widerste.  
hute dich vor dir selber. so bleybst  
an we. Stets vrteyl dein gebrechen  
und leben. so magstu got schuldig  
eher gebenn.**

Das sich yeglicher vom Teufel / vnd weltlichē ver-  
suchungē verwaltē sol / Ist kundlich auß gemeynen  
predigenn / derwegenn wil ich uymdnts bennwhenn  
desz mals. weye wol ich von den selbenn tzeyen fry-  
gen was tzesagen hab / das ist vvilleicht wunderbar-  
lich / das sich einer vor sich selber furschenn sal / szun-  
de tzuorhuten.

L



Augu. de ex  
pecca. meri. li  
10. ij. ca. xxij.

Augu. in Jos  
in trac. xli.

Roma. vi.

Roma. vij.

**Das ist unser schand. das fleischli-**  
keit vns wyderspennig vnd vngheorsam ist/dan wyr  
solge vnd instparkeit/aus franckheit des fleisch habē/  
welche wir mit sundē verdynnt/vnd auch die sund/die  
in leiblichen glidern hauszhablich sitzt vnd wanet ge  
nant ist. ¶ Der mensch wurt alhie nit so heilig/starck  
vnd dapffer/das er/obgedachten vngheorsam gar vn  
der sich genotten/vnd abtun kan. Auch haben heilis  
ge eugenden/allein dysc oberkeit vnd macht/gegē iren  
gelydern/das sie ire glyder/der sundē ym fleisch wan  
hafftig/nicht leyhen. Als wan einer von wegen erlitē  
sinacheit/sein tzungem dem tzorn nit leyst volgenn/den  
verhoner tzu schelten/vnd helt die hende bey ym/das  
sie nit schlagen/aber/die vettern nemē/wyder sein be  
beleydiger tzuschreybenn/das kan der mensch thun/  
aber das er/wan ym merckliche scheden vnd verders  
ben/oder wort die ym verleumē furfallē/sonder tzorn  
sey vnd bleyb/ist nit tzu erlangen. Darumb kan eyner  
wol gelobē vnd halden/das er nit schlecht wan er vor  
wund wurt. Aber nit tzu tzornen/ist nit yn vnszeren  
magt tzulassen. Derhalbenn Bernhard<sup>9</sup> yene billich  
verlacht/die schweren/das sie nit sundigen wollē. vñ  
Paulus sagt/Die sundt/sal nit regirē in ewerm sterb  
ligem leib/auch solt ir ewere glider/als weer der bosz  
heit/der sund nit tzuwschieben vnd dar leyhen. Paul<sup>9</sup>  
spricht nit/das dye sund in vns nith seyn sol/sonder/  
sie sal nith reygiren oder herschen. Dye weil dan/dye  
sundt yn vns ist vñnd streydt wyder den geist/habē  
wyr vns/vor vns tzuforchten. Dan ich bin der selber  
schreyth spricht Paulus mit fleischlikeit dyen ich der  
sund/aber mit dem gest goth/wyder gedachte vngel  
horzame franckheyt/haben wyr ein grawsamlichen



stret/selig ist der yn besündt/vnd gestrenglich vnd  
dapfferlich begegnet / vnd wydderstandt thut/dan  
wir fechten nit gegen der lufft/sonder wyder vns selb  
ber. dan wir haben den feind yn vnserm leip wanhaff  
tig. Darumb sprach Paulus. Ich castey meynenn  
leyp /vnd treybe yn tzu dinstparkeit. Das verboth/  
du salt nit begern/hat vnd wurdte keyn heyliger alhye  
volpracht oder volprengen/were das volendt/der hat  
gar kein sundt/dan disz verboth/beschleust in sich al  
le verboth. Werhalben auch annemlikeit vnd vngez  
lassenheit/von welcher obenn gesagt/bey dem spruch  
rechter handt/begriffenn. Dye sundt in gelydern  
verseufft ym Sacramēt des tauffs vñ erdrinckē dz sie  
vnbeweglich/wy ein stein wurt also dz sie dē mēschē  
yn ewig verdābnus nit tzeugt vñ wurfft. Dan wan  
der geist gots yn dye wasser bleest/so bedeckē die was  
ser die Aegipciern vñ dye sund vallen tzugrundt/das  
ist wer gewaschen wurt /ym geyst vnd wasser/dem  
fallenn sein sund tzu bodenn/ vnd mugen yn nicht  
verfolgen tzu ewygem schaden. Aber weyl der Aegip  
cier /die sundt/mit sampt dem alden Adam/yn vnser  
ren meer vnauszgeworffen/vnbegraben vnd vnuer  
wesen ligen/stincken sye/vnd werffen dem geist/man  
nigfeldig vnlust fuer/vnd spenen sich wyder begnatē  
vnd vergeisten willen. Dye verstorben sundt schewbt  
dem geist vil nerrische hyndernisz vnd schedlich begir  
de tzu. Darumb clagt der weysz sprechende/ Eyn  
gros kummerung ist allenn menschen beschaffen/vñ  
ein schwere ioch (verstee den krieg bederfeit des geists  
vnd fleisch) vber die sone Adam /vom tag des ausz  
gangs/von yrer mutter/bis yn begrebtus in vnser  
aller mutter dye das erdrich. Nun horest du/das dye  
sund dem geist wyderwerdig ist/so lang bis die sund

1. Corinth. ix.

De spir. 7 lite  
c. iij. cū alles  
gat nostris.

Exo. xv.

Exo. eodem.

Aug. 2. trs. Jo  
lt. li. ij. Bern.

Ecclesia. i. x.



Jacobi. i

Namen vnser  
einwanendes  
veindt.

nach gesprochen endurteyl tzu puluer wurt vnnnd der  
sententz gar voltzogen. Das ist/das vns sant Jacob  
gelert. Ein ytzlicher wurt von seyner begirlichkeit vers  
ucht geretzt vnd abgetzogen verstorvt vō dem gutten/  
tzum bosen/darnach so begirlichkeit empfangenn hat  
gebirt sie sund/vnnnd wan die sund volendt ist/szo ges  
birt sye den todt/das ist/das der heylig Augustinus  
gesagt/wir habē den feind in vns/der vns tzum vbel  
tzeugt/vnd sundt furtregt/der veint ist/begirlichkeit vñ  
sund/yn gelydern gelassen/genant/aber durch genad  
gots getotet/der veindt wurt durch vnser bewilligūg  
yn sein geuerlich vnd erschleuff vnd furschrieb/gar les  
bendig/darumb hute dich vor dir selber/dastu deys  
ner Francken naturlichkeit/nit tzewil nach gebest/vnd  
dich do mit yn ewig verderbenn werffest. Hiemit er  
weeg/eygenschaft des creutzs in der leng/dor yn dye  
fues steent/vnd nach erlangter genad vnd merung/ir  
macht/in das reich der sunden/tzu bedringen/fur vñ  
fur/bis in totlichen abgancē settzen.

### Urteyl dein leben stets.

Meynes bedückeres/mugt einer wol aus obangetzey  
chten schrifftten /so im beuelchbrieff vnd von gerechtē  
des creutzs ertzelt/gnugig werdē/Aber die weil groß  
vnd vil am vrtteyl gelegen/ist tzu wissen /das wir teg  
lich an vnderlass/alle vnser sunden/sye seint kleyne od  
gros/wissigklich oder vnwissigklich/todtlich od teg  
lich mit ernstlichem vleis suchen/vnnnd was du nit yn  
dein guten wercken finden magst/saltu got mit Job  
senlich bitten/sagende. Mein laster vnd sund/szo ich  
aus vnwissenheit gemacht/tzeig mir/leer mich. Dan  
wulte ich mich gerecht/vnd an mangel/der gerechtig  
keit machen/so wurt mich mein mawl verdammen/

Job. xliij.



werde ich mich als ein vnschuldigen achten / so wurt  
mich got / ein verkeren beweysen. Wir haben vil sund  
die wir nicht erlernen konden / als David beschriben  
Wer kan sein irrungē vornemē / das seindt funde / dye  
wir yn vnwissenheit verhandeln. Darumb von den  
verborgenn sunden mach mich reyn / wer weiß ap er  
gots tzorn würdig aber vnschuldig / vnd schwer tzuer/  
grunden ist / ap einer todlich oder vntodlich sundige  
dan alle fundē seint todlich die wir nit beclagen vnd  
verwerffen / auch werden klein schulden gros vnd vn/  
uergeblich / wan wir nit vorgebenn. Es ist noch keyn  
dapfferer gekummē / der vns vntodlich sunden / ver/  
stendiget vñ erkennē leert. Darüb ist der spruch falsch  
**Unsere lerer. gut bekerer. hab uber  
Propheeten ergründt. vnder sheyt  
todlicher vñ vntodlicher sund was  
ist imputat furwurfft tzornig. non  
imputat vergibt gnedig.**

Aus itzt vertzelten wortenn / machen etzlich lacherey /  
vnangesehē / dz sant Dauid die schrifft fur sich getzogē  
Selig ist der / dem got sein sund nicht furwurfft / dem  
got sein schuldt acht / als het er sie betzalt. Du salt  
dich teglichen endsinnen / ap du yn wercken vnd gutē  
vbungē angehangt / vnd die nit geburlich auffgetragē  
Itē aber du vnlustig vñ trawrich yn woltun gewest /  
vñ ye dich volerinnern / wie dir eigē eher furgesallē / vñ  
der gleichen gebrechen furgetragen seint / dan du mus  
ste ye mit / der verwunten natur fechten / vnd also dein  
werck an das rostig vnd kotich schwert / deines veins

L iij

Job. ix

Psal. xvij.

Eccliastes. ix

Todlich  
sunde.

Horlegig ey  
nes spruchs

Roma. iij.

Aug. de perō  
fecti. iust.



wie du yn ytz  
liche wercke  
sundeckst.

Job. xiiij.  
Psal. cxviiij.

1. Joan. 1.  
Psal. lxxxiiij.

Veritas de te  
ra orta ē: 2 in  
ficia de celo  
p̄spexit  
Esa. xliij.

Esa. xliij.

des streygen. Darumb auch worhafftiglich mit Au-  
gustino sagen. In dem/das mir vntzimlich vnd ver-  
boten bewechlickeyten meynen natur tzugeschobē ist/  
sund ich. Also sol dein vrt Eyl in ytzliche werck sehenn/  
vnd alle gebrechen/als/wenigkeit/vberlustigkeit/an-  
nemlichkeit/tragheit/vnd vertriszlichkeit/mitsampt den  
grobern vorhendelungen fur got bringenn. Als Job  
sagt. Ich werde mein weeg vor ym straffen/vnnd so  
wurt er mein erloser. Als auch David geschribē. Ich  
hab dir meine weeg furgelecht/vnd du hast mich erh-  
hort/vnd. S. Johannes Werden wir vnnsere sunde  
bekennen/so ist er gerecht/vnsere sunden tzuuergeben  
sein gerechtigkeit sibet vom himel/so baldt warheyt  
ym erdrich auffgeet. Dan es bald der mensch sein sun-  
de bekend/so gebirth er die warheit/vnd darumb sy-  
het goth mit gerechtigkeit yn dem menschem/dan er  
macht yn gerecht. Hirub sagt Esaias /Du salt deyn  
sund tzufuer bekennen/das du gerecht werdest/dan  
got vorgist/so wir gedenccken. nach dem got durch  
Esaiam gesprochen/gedencke du deiner sunden/so  
gedenck ich der selben nit. Der wegen ist der spruch  
tzufassen/got spricht.

**Sag mir an du etwas hast. dar-  
umb du gerecht fur mich trabst.  
Antwort der mensch. Ich bring fur  
dich mein possheit. das ist mein ge-  
rechtikeit.**

Dann vnser gerechtigkeit magt nit grunen/sonder  
vrt Eyl/das ist die edele/trostbare gerechtigkeit/von



der Job gesagt / Ich weiß / so ich gericht vñnd geur-  
teilt werde von got / so werde ich gerecht gefunden /  
wiltu bey got sein gerecht / so vortzel ym dein schalk-  
heit. Wiltu von got ein absolutorien erlangen / so  
mustu dich beuor vorurteylen / dann got wil nicht  
anders von vns haben / dann das wir vns ym schul-  
dig geben / als Crystostomus leert / dann kein gleisz-  
ner bestet vor got / das bekennen / ist die heilig gerecht-  
tigkeit / nach welcher David sich begert tzu vtheilen /  
sagende / Er wurt mir geben nach meiner gerecht-  
tigkeit / vñnd reinigkeit meiner henden. Ich erken-  
mein vnreinigkeit / das ist mein reinigkeit. Als Job  
sagt. Mein hertz strafft mich nicht / den ich vour-  
teil mein weeg / nach auszlegung Augustini. Dar-  
umb sagt Esaias yr solt das vtheil bewaren / vñnd ge-  
rechtikeit thun. Also auch der Prophet geschriben.  
Selig sein die behuten das vtheil / vñnd machen ge-  
rechtikeit. Dann in diesem weeg keret das vtheil /  
tzu der gerechtikeit / vñnd vordirbt keiner. Entlich  
wiltu sicher sein / so behalt diesen spruch Job. Ich  
bin angetzogen mith gerechtikeit / vñnd hab mir  
das vtheil vmb getzogen / wie ein kleid oder mantel  
vñnd hebvt fron / das vtheil eygner schulden / muß  
alle vñnd yetzlich werck vmbkleiden vñnd Fronen / vñnd  
also magestu dich klein / arm / vñnd nicht / widerumb  
got groß / reich vñnd alles / also gibstu got schuldig  
cher / vñnd magst sprechen durch dein creutz / dastu  
mir gegeben / reynigestu mich / machst mich le-  
ledig vñnd selig.

Job. xliij.

Job eodem

psal. xvij.

Esa. lvi.

psal. cv.

psal. xliij.

Job xxix.

**Spruch des tieffen. vñnd verborgenen  
teyl des Creutz.**



**Aus tieffen gots willen gerechten  
vnd starcken. wechset der mensch  
mit seinem creutz vnd wercken.**

Ephesi. ij.

Paulus spricht/wir sein ein geschaffen creatur gots/  
gemacht tzu guten wercken /auff das wir yn werckē  
wandern/die vns got in ewigkeit bereit hat. Got hat  
durch seinen willen vns geordnet vnd gesetzt in ewig  
keit zu allem dem das wir von ym haben/vnd macht  
alle werck yn vns /vñ furt vns/durch alle anfechtung/  
also macht er dz creutz. Ich wil hie vñ/ein eygē buch/  
lein machen von dem willen gots.

Das bild Christi hat in der gerechtē dysen spruch.

**Gelas eigē willē alles dein vñ dich**  
vnd weist an die gerechtē des Creutzes/do selbst such  
was gelassenheit/vnd wysz/du must dir vnd deynem  
willen absterben/wiltu anders dein creutz ertragen/  
vnd fruchtbar werden/als geschribē/es sterb dan ein  
korn/so bleibst allein vnd an frucht.

In der lincken /ist dyser spruch.

**Dein creutz nim dir vnd volg mir**  
Als solt er sprechen/dein creutz das ich dir in ewiger  
lieb bereit vnd tzu geteylt hab/das nym tzu dir/vñd  
folg mir/stehe nicht/gehe fuer vñd fuer/ doch nach  
mir/nach dem Jeremias geschribē. Ich hab dich yn  
ewiger lieb gelibt. Darumb hab ich dich in barmher  
zigkeit tzu mich gezogen.

Jerem. xxxi

**Einganck vnd tzutritt.**

Wen vñ was/das abgerissen mansz bild oberstes wa



gen antzeig/ist wol aus eingeleibten schrifften/so den  
wagen vnd pferden anhengig seint/tzu ersuchen vnd  
erdencken. Auch ist mein gemut nie gewest/das ich  
ein sonderlich person/die mir sipschafft oder sunste  
freuntlicher geselschafft vn̄ gunstiger hilff wegen ver/  
want/in obermeltem mansz bild / wult lassen furen/  
ir domit zu lieb spilen/nach dem ich auch widerumb  
keynen orden/durch das monischbild ym nydersten  
wagen vn̄billich tzuuerletzen furgenōmen. Es wurt  
auch keyn Prediger Monich / welcher sich eyn teyl/  
gern tzu frembdē sachen benottē/vnd selbst tzuschaf/  
fen machen/beweysen/das obbedacht bildt eins pre  
tiger Lappen hab/vnd wil den gern sehen /der mich  
vbertzegen kan/das ich ein Prediger bildt auff tzu  
reissen beuolhen. Weyl sie mich dan vn̄erkanter sachē/  
vn̄billicher weysz mit vntzuchtigen Worten/wyder or  
denung geistliches leben vnd des rechten verleyment  
in gots stellen/predigstulen/do yn nit geburt/irn eygē  
sachen obtzuligen/vnd vermeinte angetzogen iniuriē  
mit fluchreden/zubreythen/wan ynen kunst gebricht  
Wil ich mich/meyner clag rechtes vnn̄d schulde/mit  
dysem schweygen/mit nicht vortzeyhen vnd entwerē.  
Vnd sag das ich mit obgemeltem bild/des obersten  
wagen auch nymants hoffiert hab. Aber es bedewd  
ein gerechten sunder//eyn buszwircker/vnn̄d creutz/  
trager/der sein miszhellung vnd gebrechenn/yn schul  
diger peen/nach gotlichem willenn wyderlecht vnn̄d  
entricht/ya yn solicher peenn vnn̄d straff/welche yn  
kein sacrament abnemen kan/dan der sacramentē an  
tzeyge vnd einhalt/vermanen vns rzu Ch̄ristlichem le  
ben erfullung vnn̄d gotlicher gebotten.

**Heilig Schrift vergleicht Augustin**

**D**



Joan. vij:

einē wagen/der nicht mer vermack/dan zu dem rech-  
ten artzt furen/gleicherweiß als ein hultzerin hand  
am/weeg allein dewtet auff die rechte strasz / gibt  
aber dem bemutē vñ schwachē fußgener kein krafft /  
allein weist sie yn tzu ferner arbeyt vnd vnruh/. Al-  
so tzeigt vns die schrifft Christū / vnd gibt getzeug-  
nus das er der warhafftig helffer ist / vnd das wir  
Krancke/elende/wuste vnd vordorbē. Auch das vns  
sonder gotlich eingebung aller creaturn gunst vnd  
tzuthon vndienlich ist. Endlich das vns einiglich vō  
got durch Christū Jesum geholffen wurt. Also wei-  
set vnd furet vns die schrifft in vnser eygen wustung/  
vnd spricht/weider vormack ich nicht/wiltu nit vn-  
geholfen bleyben/so mustu an Christum schreyhen.

## Wort vnd laut des tzetels am ober- sten wagen.

Wiewol gotlich schrifft gut ist vnd heilig.  
Dannach macht sie die sunde kressstig/heuffig.  
Dient vbertretungtzom vnd todt.  
Beschleust all menschen in not.  
Bemeert boszbegerüg/dartzu sundlich bandt,  
Damit Christus allein heiliger wert erkant.  
Vnd hab yn der schrifft kein trost.  
Der werden wil in Jesu erlost.

## Declaration.

Roma. vij.

Darumb ist gottes gesetz (als Paulus spricht) hey-  
lig vnd geistlich. Vnd Augustinus erkleret / das es  
dem menschen sein sunde offenbar kundtlich vnd  
vnlangbar macht vnd das leret/das natürlich begir-  
lickeit bosz ist/vnd dem geist gefערlich tzuschub vnd



derschleuff eintregt/vnd entlich vns vorstendig das  
vnserer Franckheit durch kein creatur abgnumen wer-  
den magt/vnd das got durch Christum vnsern her-  
ren alle heyligkeyten vnd geistlichkeyten in menschen  
schafft.

## Das gesetz macht die sünde kref-

tig/als Paulus sagt. Die sünde niembt durch das  
gesetz vrsachē den mēschen tzubetriegē mit süßigkeyt  
der sünden/dan̄ das gesetz vnd vorbewt die sündt/  
weyder wircket tzeigt es nicht. Nun ist ein vblich  
sprichwort das verboten brot vnd fruchten seint vil  
süßer dan̄ vnuerboten/das wir alle gneicht seint / tze  
lauffen in verbotten dieng. Darumb spricht Paulus  
wie der tod mit der sünd als mit einem stachel oder  
dorn vnser sterblichen leib durchdringet/also nimbt  
die sünd durchs gesetz ein scherpf vnd torn/darumb  
er beschleust das die schrifft der sünde krafft/macht/  
vnd sterck gibt. Virtus peccati lex. Vnd tzu den Ro-  
mern spricht er also. Anfechtung der sünden/welche  
durch das gesetz sein haben in meinen gliedern gear-  
bet/auff das sie dem tot fruchtbar wurden/du ho-  
rest das wir auß dem gesetz vmbtreibung der sün-  
den haben/die auß der schrifft mit onableßlicher an-  
fechtung ergeen vnd vns vbertziehen betrengen vnd  
wusten. Item das die sündt durch das gesetz yr-  
macht erstreckt/auß dem scheinlich volget/das die  
sünde durch geschrifft krefftig/vnd der mensch krafft  
leissig wurt. Derwegen sanctus Paulus nach ober-  
meltem sententz gesagt. Als gebot oder verbot kam/  
do wurd die sünd lebendig/vnd starb ich vnd Das  
uid gesprochen/dein pfeyl seint mir eingehefft/vnd  
hast dein hand vber mich vestgemacht. Nach dem

Roma. vij.

Corint. xv.

Roma. vij.

Roma. vij.

psal. xxxvij.



ij. Corin. iij.  
Aug. de spi. 7  
lit.

Lanti. v.

Lenti. v.

Job. v.

Hiere. xxxi.

psal. xxxvij.

Matthet. viij

Job. ix.

S. Hieronymus dysen spruch ercleret. Wan got den mensche mit der schrift scheust / vnd sein geist der gnaden nit mit gibt / so macht die schrift / der vberfarung schuldig. Darüb auch der heilig Paulus gesagt. Als Augustin<sup>9</sup> erclert / der bustab todet vñ d̄ geist macht lebendig. Das ist vns alles lustiglich mit verdeckten worten wiszlich die ym Lanticorum lesen also.

**Die seel clagt: sagende die veruel-**  
der oder hueder der stadt / haben mich gefunnen / geschlagen vnd verwundt / vnd mein mantel genummē .i. die pastorn vnd prediger Christlicher kirchen. Welche die heylig stadt ist / haben mich gefundenn / merck sie spricht nit / sie haben mich erweelt / bekert oder heylig gemacht / das Bernhardus hochlich bewegt / sye haben aber mich gesucht gesammelt vnd tzu heyliger stadt gefurt / ya wie / hore / sie haben mich geschlagenn mit dem gesetz / mit obberurten pfeyle. dan got durch sein lere vnd prediger / schlecht er / wan vnd welchem er wil / Aber als Job sagt / du salt beleib gottis pfeyl vnd straff nit fliehen oder schelden. Darumb das got schlecht / vnd macht gesundt / das ist das schlagen vñ dē Hieremias schreibt / als du mir mein sūd̄t getzeigt vnd mich beschempt hoyst / hab ich mein hufften geschlagen / aufferlich czeychen geben / meiner rew / also schreyt David / Mein gebeine habenn kein fryd / vor meyn sunden / die mir surfallen. Also schlecht got den sunder etwan durch mittel vnd verwundt yn. Wann er pleest / mit seinem geist in das meher / szo steent dye iunger yn verderben vnd geschrey / dan got macht dē sunder / sein sunden mechtig / vnd verwūd vnd heylet yn wie Job vnd Oseas sprechen. Got kumpt in seinē wegen vnd tzerreibt. i. macht rew in eynē sturmwind



das kumpt dauon/das die sünde vber hand nemen/  
vnd durchplewen den gerechten sunder so vast/das  
sein geist keyne rwe empfindt vnd feelt in abgrund sei  
ner nichtikeit/sprechēde. Ich stee in der heel vñ gleub  
nit/das got mein geschrey erhör. Als dan suchet dye  
Seel/vnd findt nit/rufft dem erloser/aber er antwert  
nith. seylig ist der/dem die sünde durch das gesetz zu  
solchem getreng/kressig werden. So ym/der man  
tel oder beeltz/mit dem Adam vnd Eua ire sunden  
bemantelten/endschultigten/vnd verdeckten/yn sol  
chen engstlichem betreng abgeet vnd außgezogen  
wurd/dan keyner magt in soligem mantel vnd excep  
tionen der sunden Christu sehen. Als Ambrosius ge  
schriben. Aus obgesagtem sententz/solt ir ein zugack  
machen/tzu den andern spruchen/wie die sund heuff  
fig vnd totlich zc. durchs gesetz wurd.

Job. ix

Job eodem.

Lanti. v.

## heuffich.

Augustinus gibt ein schonn exempel/wye dye sünde  
durch das gesetz heuffigk wurth/das also lauth/wye  
yngestummikeit eines schnellen flyssende wassers/  
schwynder wurt vnd heller prawscheth/szo man eyn  
grossen gegenwurff/als ein mechtigē stein eynwurffe  
dan dye wasser samelen vnd hewffen sich/vnd arbey  
ten/den einwurff außzuzulen/vnd wan das versam  
melt wasser ein solichen schutz gewindt vñ außwurf  
fet/so vbersturtzet es vñ vberweltzet sich/mit ein gros  
sen hauffen/vñ fleust geweldiglicher gen tall. Also be  
schichst mit vns/vnsere bosz begirlicheit/die ein sünd  
genat ist/wie ein wasser. vñ so mā ir dz gesetz furwurft  
wie dan vns die heilig schrifft furgelecht/so samelt sich  
natürlich begirlicheit/vñ wirt heuffig/vsuchet auch dz  
gesetz außzuzulen/dz baldt/sond gnedige gots hilff/

D iij



Roma. vij.

geschicht / vnd wan die sund das gesetz vberwunden / so vleuffet sie mit grosser macht vnd versammlung. Dar umb macht die heylig schrift / so ausserhalbenn dem hertzen / beschriben / die sund heuffig vnd mechtig / dz dan sant Paulus auch spricht / die sund nymbt vrsachē durchs gesetz / das sie weiß vbermassen vnd gross sundig wurt.

Roma. iij.

**Das gesetz dient ubertrettig. Dan**

als Paulus sagt / wu kein gesetz ist / do ist kein vberfarung / wu aber das gesetz als gebot vnd verboth / do ist vberschreytung. Vberfarung ist ein sunde / die sich gleych dar außz erhebt / das eyner / wyder das gesetz handelt / oder gebot / vnnnd verbot verachtet. Welcher sonder gesetz sundet / der verdirbt auch sonder das gesetz / welcher aber sundiget / wissenlich wyder das gesetz / der wurt durch das gesetz verurteylt / gleich wie einer / durch glauplich deposicio vñ getzeugnuß / also wurdet der sunder / durch heylig schrift / seiner misse-

Roma. ij.

tat / vberweist vnd vberwunden. Auch ist das gesetz d verbrechung halben verordnet. Als Paulus sagt / dz gesetz ist von wegen / der vbergehung gebenn / wu dir der saem / Christus / nit zukömet / so dynt dir / das gesetz ( das ist alle heylige gebot vnd verboth gots ) tzu verbrechung vnd tzerruttung / dan Paulus sagt clar / wye das gesetz darumb kömen / dz die sundt vol wert vnd vberfluffig.

Bala. iij.

Daraus volget / wye das gesetz / dem tzorn vnnnd todt dient. Als S. Paulus spricht / das gesetz wircket den tzorn / vnd das die sund durch gut vnd heylig schrift / den todt machet. Endtlich du hast das naturlich gesetz nach dem selben spricht David / Ich hab alle sunder dyszer werlt vberschreyter geacht. Item das alt

Roma. v

Roma. iij.  
Roma. vij.

Psal. c. xv.  
Treyerley ge  
setzt.



vnd das new Ewangeliſch geſetz / Ich rede alwegen  
hye von dem geſetz das mit menſchē finger auſſerhalb  
ben dem hertzen / vnd nit durch den finger gottis geſ  
ſchryben. Aber alle vnd yegklich vorgemelt heiligenn  
ſchryfften toden den menſchen / dan ſie verbieten ſun  
den vnd tzeygen Chriſtum aber helffen dem menſchē  
nit weyter. Darumb muſz der ſunder in der ſchriſt  
ſterben / wan er in ire / andere hulff ſuchet / dan ſcheyn <sup>Hilff & heylig</sup>  
liche antzeygūg gotliches willē vnd vnſere Franckhey / <sup>gen ſchriſt</sup>  
ten / dan der buſtaben / an gotlich genad held den vn  
gutigen gefangen.

### Wie die ſchriſt begerung gemeert.

lerne alſo / Vns iſt gleich als eym / d todlich kräckheit  
hat / vñ erſtet od lernet ſein kräckheit durch ein buch /  
dan er lyſt was er fuer ein kräckheit hat. darüb forcht  
er im ſelber vñ iſt im fur ſich ſelber ybel. Aber er ſuchet  
furth vñ find den artzt vñ die mittel / die yn wydbrens  
gen aber geſund machen mugen / baldt entſpryſſen yn  
ym hoffnung / glauben vnd lieb tzu dem artzt / nach  
welchem er hertzlich anſehet tzu ſchreyhen. Alſo verſtē  
diget vns die ſchriſt vnſere geiſtlichen Franckheiten /  
leeret vns weye wir vns ſelber / mit vnſerm geſtanck er  
kennen ſollenn vñnd tzeigt Chriſtum ſagende / der iſt  
dein heyler. Darumb glaub ym vnd beger ſeiner hulff  
wan dan Chriſtus das erdriſch beſucht / vnd machſt  
begern / ſo hilfft er vnd erhört / als geſchriben. In yegk  
licher ſtadt in welcher ich euch mein tzu denckē mach  
werd ich zu euch kōmen. Als die Hebreiſch ſchriſt in  
helt vnd lautet / in dyſer weys erſcheuſſet dye ſchriſt.  
Aber in dem das ſie gemerung tzum boſzen ſtercket /  
furderth ſie den menſchen nit tzu der ſeilikeyt. Idoch  
kan got / weye er dan vil gethan / aus dem boſzenn das



beest tzyhen. Als ich oben ym Creutz geschriben. In  
 disem weeg kumpt der mensch yn schandt vnd bandt  
 dan dye schrifft meniglichenn vnder dye sundt bes  
 schleust. Also hath der mensch in der geschrifft keyn  
 trost/vnd weisz das er allein durch Christu wurt er  
 lost. Item das er sich gar vnd eyniglich an got halde  
 sal/dan die schrifft wil beschlislich/dastu got beken  
 nen/lobē/preysen vnd mit glozen wirdigē vñ erē solt.

**Got sein volck nit veriachtet (chet.**

**Weil gerechtikeit in dē vrteyl wa**

Dysenn versz / der ym lxxiiij. psalmen stehet/hab ich  
 ym beuelh brieff/vnd lewterung des Creutze/auszge  
 lech/ist kurtz dye meynung. Wiltu ein gut werck thun  
 das got annuntlich vnd auffnemlich werde/szo saltu  
 dein recht vbungē/mit dem vrteyl vmbcleyden / vnd  
 dein werck schnot/vnd ring wegenn / darumb verge  
 bung bitten.

**Du hast mein gewissen bewegt**

**Vnd in hart gedreng gelegt**

**Nun bis dem gnedich**

**Den du machest reuich**

Both der macht warhafftig vnd lebendige reu  
 vnd leyd vber vnser sund/vnicht vnd nser aygen willē  
 weye doch dye ym vndersten wagē lerē/sprechēde. So  
 vernunfft sunde betracht/vñ eygewill veracht/machen  
 sie leyd vñ reu/vō solchem wasser wurstu new/Aber  
 dz ire rede vnwar/vñ vnser spruch gerecht vñ bestēdig  
 in d schrifft sey/vnd weisen vns ppheten/vñ aposteln.



David sagt. O got du hast dz erdtrich bewegt / vnd  
es ist betrubt worden / mach sein rew vnd leid gesund  
dan es ist bewegt worden. Wiltu noch eins horē / wer  
den yrdischen willen bewegt / merck David spricht /  
du hast deinem volck sein hertikeit getzeigt / vnd vnns  
mit wein der tzitterung / forcht / vnd tzenbeissen ge  
drencket / nach inhaltung Hebreyscher warheit / yetz  
gemelt betrubnus begert David von Got / in eynem  
andern psalmen vnd spricht also. O got du hast / mein  
heymlicheit ertzelt / nu setze mein augenn tzebern / in  
dein gnedig vnd barmhertzig angesicht. Daraus vn  
laugenlich volget / das wir rew vnd leidt von got bite  
vnd empfahen / als Iheremias betzeugt / tzufer vnns  
so werden wir bekeret / vnd Asaph kere vnns tzu dir /  
tzeyge vns dein gnedig angesicht / so werden wir selig  
Augustin<sup>o</sup> helte volgedē leer fur ein vnuerenderliche  
vnd veste regel. Was wir von got biten / das habē wir  
nit / in eygen vermugen. Darumb mugenn wir nicht  
rew vnd leid / von vns selber / vnd wen wir wollen ha  
ben / wir müssen aber got biten / der vns rew eingibt.  
Das vns Iheremias offentlich kunt thut / sprechend  
Nach dem vñ darumb / dastu mich bekeret hast / hab  
ich buszfertig leben / rew vñ leydt gethan. Ist es nith  
kundlich / das got vorkumpt vnd wir volgen / vnd dz  
got busz gibt. Als Paulus sagt / ein dyner gots sal die  
yhone / so der warheit widersteē vñ gegenpellen straf  
fen / ap yn got etwan buswirckun gegeben welte / dye  
warheit tzuerkennē zc. vernyme er spricht / ap got busz  
geben wurde / wil aber got rew macht vñ gibt so wer  
den wir an vnserē furarbeit rewig / Augustin<sup>o</sup> spricht  
wer anders helt vnd red aber leert / der ist ein ketzer  
vnd sal als ein bennischer vernymden werden.

¶ Mein gunstiger leser oder horer / merck ap dir vnd

psal. lxx.

psal. lv.

Ihere. xxxi  
psal. lxxix.

Ihere. xxxi.

ij. Timo. ij.

de fide ad pe  
trū c. xx. xi. es  
xliij.



Christlichem volck nit von noten sey tzuwissen/ das  
die rede/rewe vnd leid belangend des nidersten  
wahren den menschen vorfure vnd tzu der helle leide.

## Dein wil gesche

Der gerecht sunder bit das gots wil gesche/ in leiden  
nemen vnd geben/ das ist/ das got in dem sunder vñ  
seinem knecht alles machen wol/ das er gebewt vnd  
von ym fordert/ wil got haben das ich leiden sol/  
sprech ich/ dein wil gesche/ das ist/ mach das ich  
fruchtbarlich leyde. gebewt mir got sein gebot tzu/  
uolbringen/ sol ich yn biten/ dein wil gesche/ mach  
das ich dein gebot tun/ vnd dir gehorsam sey. Dann  
mit dem kurtzen gebet biten wir got/ das er in vnns  
sein geboth volbringen wol. Wan got spricht kerent  
euch tzu mir/ bitē wir/ dein wil gesche/ dz ist mach tzu  
ker so wir horen. Nach ewrer begirlicheyt solt yr nit  
gan. Biten wir dein wil gesche/ mach das wir nit  
geen. Item tut gerechtikeyt/ busz/ betent/ wachēt/  
dient got/ vnd der gleichen. Wan wir ein gebot vnd  
vornamung tzu etwas horen/ sprechen wir/ dein wil  
gesche/ mach gerechtikeit/ busz/ rew/ gebeth/ wachē  
Die volget laut d oberstē redē wy sy gesetzt vñ geordēt

**Ausz mir furent mich**

**So mich ansech erschreck ich**

**Wie gern wer ich mir from**

**Wan mich selbst erkou**

**Brenge mich von meinem kot**

**Ich drieff ausz grosser not.**



**D**ieser gerecht sonder kan bey ym selber nit bleibe  
nacherkantem vbel / das er ym selber gemacht. Er be  
find sein vngutig / raubig tzunegung zu dem das ym  
shedlich / das er ein erseufften Egyptiern im meer  
noch vnauszgeworffen helt / mit dem er fechten musz.  
Itē das er ein rostige beflechte seggen ist / vnd ob gleich  
got ein gut werck durch yn thuet / so beflecket er das  
werck. Itē befindet er in sich guttat vnd dienst gots /  
bald felt ym annemlichkeit fur / aber wil got haben /  
das der mensch leiden sol / so hat er vordriesz darumb  
wen ersich im geist / fleisch vnd werck wol angesicht /  
so wil er in dem seinen nit bleiben / sunder im geist er  
newet in got gefurt werde. **D**er kot ist das eyter dz  
in der seel wechsset vō stillsweigē der sundē / als geschri  
ben / Darumb das ich geschwigē hab / sein mein ge  
pein moderich worden. nach dem Ezechiel geschri  
ben Ir werdent euch nit clagen / schlagen / vnd be  
weinen / darumb solt yr eyterig vnd kotig in ewren  
sunden werden / dieses eyters wurd der gerecht sun  
der gewar / so ynen goth vberfelt vnd betrengt als  
dann vorytert das eyter / das ist wollust so in thun  
vnd lassen entset / der wurt faul / als im Job geschri  
ben stat / sein fleisch wurt eytern vñ sein kressstē werde  
offenbarn / wage got sunde strafft so wurt sterck des  
glaubē scheinlich / wywol dz gut ist dz eyter vorfaul.  
Idoch stet der sundige kot dē mēschē fur den augen  
wie dan alwegē steen sol / als geschribē. mein sund ist  
alwegē vñ alletzeit wider mich / dan du solt betrachte  
das got den mēschē nit vnschuldig macht / so er dem  
mēschen die sund vorgibt / als Naum gesacht / der we  
gē auch kumet / das got alt vñ vortzyhē schulden vor  
neweet / vñ fur vnuergeben heldet / wān einer seinem  
nechstem nit nachlast / vnd ledig macht / als die histo  
rien von dem vnbarmhertzigē knecht / der seinem

psal.

Ezech. xliij.

Job. xxxij.

psal. xxx.  
Naum. j.



Psal. cxv.

mit knecht kein barmhertzigkeit beweyst / vermeldeth  
vnd also wurt der gerecht sunder in bitterliche erkēt  
nus seiner missenteten peinlich gehalten / derhalben  
spricht er wie David / mein seel schlefft vor grosszem  
vertriesz / oder als die Hebreisch tzungenn gibt / mein  
seel trieffet vor grawlicher torheit / meynen sunden von  
die sein kot vnd not begeret der sunder tzu gotlichem  
lob tzu kumen / do mit er als ein freyher dienstman got  
vnuorhindert wilfaren mug.

**Got yn vns schafft  
Alles das er gut acht  
Er pflantz rechte willen  
Mit fruchtē vnd wurtzelt**

Roma. ix.

Dohin mugt ich disen tzyhen / alles das got gewolt  
hat / das hat er gemacht / darumb kan nymants was  
machen / das got behagt / allein got macht was er wil  
Item gots barmhertzigkeit ist vber alle yhene werck /  
die gotes sein / die got gemacht / tzu obertzelten schriff  
ten / setzen etzlichen dyse. Ich werde mich des erbar  
menn / dem ich barmhertzigkeit gewest / nach auszle  
gung Ambrosij welchem ich geben hab / genedig ein  
wircklig / dem werd ich auch mit selickheit begnadē. Al  
les dz got in vns liebet / alles dz ye got in vns annelych  
ist / das hat er yn vns gewircket vnd gemacht / wyder  
umb / alles das wir habē / das got nit gemacht / das  
neydet vnd hasset er. Also das vnser eygen werck / so  
wir gemacht / tzusampt dem / das gotlicher gnadē fel  
lig vnd verlustig / auch außgewurtzelt / vnd tzu dem  
hellische ferner gesprochen / vnd verurteylet ist / nach  
dem geschriben. Alle pflantzung / die mein vater nit ge



pflantz/wurt außgeraufft vnd entwurtzelt. Item  
alle bawmen die nit gut frucht tragen/ werden auß/  
gereiff/ vnd in das fewr gesenckt.

¶ Von gotlichen vnd vnsern eygen wercken schreibe  
Ambro. clerlich/de voca. omni. gentium. li. i. c. ij. des  
gleichen Augustinus/ Ihero. Bern. Cassia/ Cyrill<sup>9</sup>  
vnd andere heylig lerer.

**Mein fleisch streyt gegen geyst.**

**Ezu dem ergsten mich reist**

**Das boß das ich in nit wil**

**Scherust mit mir ezum ezil**

ifleisch ist gnant die kranck vnd vngheorsam natur/  
tzu dem vbel bereyt. ifleischlich ist alles/das mit alt/  
heit/so vns vnser erste eldern vordient habē/sich be/  
hulffet/es sey in entschuldigung vnser sundē/ oder in  
widerspennick eyt/so der geist recht tzu thuen begert/  
vnd ym die natur widerstrebet. Darüb dieser spruch  
Caro concupiscit aduersus spiritum. i. das fleisch be/  
geret wider den geist /magt man also außreden/die  
fleischlich oder boßhaftig natur/begeret wider den  
geist/dan so baldt der geist ein gotlich dinst pflegenn  
vnd fronen/als baldt setzet sich vnser schwach natur  
dawyder/tzuuoran so der geist gut werck/leuterlich/  
in got aufftragen wil/dan die natur/wil das ir/in al/  
len dingen suchenn. Darumb ist geredt. ¶ Ezu dem  
ergstē mich reist. Owie ein sussen schmack befind die  
listige natur/in redlichē sachen vñ geistlichē hendeln.  
wie schnell tzeucht sie/iren lust vnd benugde aus hey/  
gen wercken. vnd verachtet alle vñ yden/die nit/yn  
gleichen wercken scheynē/mit argheitzigem vteyl/vñ

E



fasset augenblicklich dyszes bey vrtell. Ich bin nicht  
als die andere/solches gefelichen lusts/ tzuschub vff  
generd/begert der frum/mussig sein/aber die versal-  
len natur/wircket das/das gutigem geist wyder ist/  
vnd scheust mit tzum tzil/Das tzil ist gehorsam vnd  
warhafftig demuth/dan yn dysen tugenden kommet  
der geist in das hochst vnd gotlich tzil. Aber so der ge-  
heiligt geist sich got vndlegen wil/als bald spandt die  
natur ir armbrust vnd scheust mit eygenschafft tzu m  
tzyl. Darumb wir vber yckliche gute werck betē mus-  
sen/vnd sagen/vergib vns vnser schuld.

Mathei. .vi.

**Ysrahel Ysrahel merck wol**

**Du bist verlusts vol.**

**All dein verderben ist aus dir**

**Aber radt vnd hilf aus mir.**

Dyser spruch ist Dsee ym xiiij.c. vnd heldet das in sey-  
ner begreuffung/das Christus geleert/aus dem her-  
tzen des menschen kōmen gots lesterung vnd allerley  
shedliche gedācken vnd fursetze / das ist das verder-  
ben das aus dem menschen erwechset/dan der frey  
wil/wye Augustinus spricht/sonder gnad vermagē  
nicht/dan sundigē. Nach dem Ambrosius auch mit  
laudet vñ gesagt/die verruckte vnd verletzte natur/hat  
nicht in eygen kressen/dan vermugenheit sheden tzu  
thun/dan weil der vnbestendig wil/von dem vnuer-  
enderlichem gotlichem willen/nit regirt wurd/ wye  
scherpffer er sich nach dem wercken stercket /ye beher-  
der vnd roscher er tzu der boszheit neyget vnd nahet/  
vnser abgestanden wil ist/vngewisz /fluchtig/kranck/  
yn begirlikeyten blindt /yn eren geschwollē/in sorgen

Mathei. .v.

despl. 2 lte. c  
tj.



angstlich/yn argwenikeit vnmuffig/tzu glorien beger/  
licher dan tugenden/gutes geruchts vleiffiger dan d  
wissenheit/vnd auß aller erfahrung/elender vñ armer  
so sye genewisset vnd besitzet/das sie begert/dan wan  
sie obertzelter/vormeinter guttatē entweret vñ vtzeihē

**Sag mir ob du icht hast**

**Darüb du gerecht zu mir trahst.**

Also spricht got durch Esaiā. tzu vnns ertzal mit et/  
was/darüb du gerecht wurst/warumb wolt ire mit  
mir ym gericht tzancken/dan wan der gerecht konigē  
ym gericht stuel sitzet/welcher darff ader wurdet sich  
eins kenschen hertzen berumen. ¶ Antwort des ge/  
rechten sunders.

Esā. xliij.  
Ihere. ij.  
Prover. xx.

**Ich bring fuer dich mein boszheyt**

**Das ist mein gerechtikeit.**

Wan der mensch sein boszheit vnd schalckheit got en  
deckt vnd fuertregt/so thut er gerechtikeit vñnd ist ge/  
recht/als geschriben steht/der gerecht ist im anfanck  
seiner reed/sein selbst anclager vñ beschuldiger/clager  
vnd beclager/aber der vngutig vnd vngerecht erscha  
tet/vñ verplendet sein sund/als geschribē/¶ Der müdt  
des vngerechte beuinstert vñnd bedeckt sein boszheit.

Prover. xv.

Also spricht Christ⁹ Eyn yeglicher der vbel tuth der  
fleucht dz licht/auff das sein werck nit gestrafft wer/  
den. Wer aber die warheit tuth/das ist/gerechtigkeith  
ym vrteyl macht wye von dem vrteyl/oben geredt/d  
kumpt tzu dem licht/auff das sein werck offenbar  
werden. Nun merck warheit vnd gerechtikeit machē  
ist sunden nit verstopffen vnd verheymlichen/sonder  
goth offenbaren.

Prover. x.

Joan. iij.

E ij



**Aller und yder heyligē werck auff  
erdreich. Seid loblich vñ straflich.**

David spricht das gots augen sein vnuolkommen ge  
sen haben/das ist mangel der lieb gots in volendung  
gotlicher geboten/das als Augustin<sup>9</sup> leret. Das wyr  
tzu wenig lib habē/kömet aus vnser schuld. Loblich  
seind gut werck das sie gutheit habē/vñ straflich das  
vnuolkömen seind. Darumb Christus gesagt wan ir  
alle gebot volbringt/so spricht/wir sein vnutz knecht  
Darumb auch Iheremias schreyt. Der ich weys dz  
der wegt nich in menschlicher macht ist / aber straff  
mich in vetterlichem zorn / Du weist das gebeth ein  
gelobt werck ist. Nu lesen wir dz Asaph tzu got clagt.  
O herr wie langt tzuernestu / wyder das gebet deines  
knechts / alle zornwürdige wercke / seindt straflich  
nach Augustini ausszag / Dye repetir abgebraucht  
schriff / auff erdrich ist kein gerechter der wol tuth vñ  
sündigt nit.

**Mein gerechtikeit acht ich als mist  
Das du mich endthebest arges list**

Vnser gerechtikeit / so wir / durch antzeig des gesetzes  
machē / ist warhafftig vngerechtikeit / dan alle gerecht  
tikeit / mus aus der abgründige gotlicher gerechtikeith  
flissen. Darüb sol nymāts von eygē werckē / die er mit  
dapfferlicher tath vñ arbeit / durch sich selbst volbrin  
get / trost vnd hoffnung schopffenn. ¶ Die weil der  
mensch in eygen krefftten vnd wercken hanget vnd an  
clebet / ist er von got vngeloffen / wan aber eyner sein  
vnuermuglicheit erweget / vnd kömet / ad felt in sein  
francckheit / sprechend / nym von mir mein vorhynder



nis so spricht ym Christ<sup>9</sup> / mein gnad ist dir gnug / woz  
ist genug? Genad wircket gnuglich in dir alles dz mir  
behacht / dan alle gotlich tugendē / werckē in kräckheit  
vñ vnuermugēheit volendet. Derwegē Paul<sup>9</sup> sein ge  
rechtikeit vnd scheinlich vbungen / die er aus vñ nach  
dem gesetz / also gehabt / das er vnstrefflich vnd vnuer  
weislich was / als mist achtet / auff das er / ym glaw  
ben vnd gerechtikeit Christi vnd seiner gerechtikeit le  
dig gefundē wurt / Aber die arglistige Judische men  
schen anmassen sich ires tuns vnd wercken / vnd do sy  
nit hyn wollen / werden sie gefurth zc.

ij. Corin. xij.

eodem  
Philip. iij.

**Vngutig narren.**

**Die yn freuelheit harren.**

**Geben got eyn teyl.**

**Guter wercken heyl.**

Mein schulmeistere / die vermuschten Theologē ha  
ben mich gelert / sunderlich Capreolus / das vnser wil  
den grund vnd selbstendikeit heyliger wercken vñ d  
heylig geist / weys / form / gestalt vñnd glantz macht.  
Aber Paulus lerth mich anders / vnd saget / das got  
guten willen mit guten wercken gibt / vñnd Ezechiel  
spricht Ich werd euch ein new hertz vnd newen geist  
geben / vnd machen / das ir macht vnd tut. Ambro.  
Aug. Bern. Cyrill<sup>9</sup> vnd andere heylige lerer. sprechen  
das got gute werck mit grund / boden / form / vnd ges  
talt / verleyhet. Sunderlich Ambro. yn seyner letzten  
Epistel. Vnd werden eygentlich / vngutige vñnd vn  
danckbare hochhertzige menschen genant / vnd narrē /  
dan die selbe weltklugen meister / seindt bey got vñnd

Philip. ij.  
Ezech. xxxvi.

E ij



In der warheit narren/dan der Nar spricht/got ist nit  
got wircket nit gar vnser gute werck/das sein dye vi  
hischen vñ tyrliche lewte/welche nit begreuffen/was  
yn von got tzu kömet. Die auch den freyhen willē ver  
derben vnd versencken.

## **Durch schalckhaffrig vngelassen heit. Lige redner gotlicher warheit**

Ligen heist meher reden dan im grundt ist / aber sich  
eins dings tzu vil antzihen vnd meher annemen dan  
dye warheit tzulasset. Nue hore annemlichkeit vnd vngel  
lassenheit stehen grundlich in dem/das eyner gotlich  
eingab gebraucht als eygen vnd menschlich ¶ Es ist  
auch vngelassenheit nicht allein in behaldung vnd ge  
brauchung guther werckenn / szonder dartzu yn ver  
lyfung. Exemplū. Got bescheert mir ein selig gab/vñ  
wil so ich sye am libsten hab. wyder von mir nemen.  
das sal ich sonder einred / gehorsamlich lassen gescheē  
Aber das magk ich nit volbringen / sonder wyder bel  
len. Dye natur wolt gern das gegeben behalden vñ  
befind ym abgehen ader absteen vnd verlyfung gotli  
cher genad trawrigkeit. Auch anmast sie sich / verlyhe  
ner gaben meer dan billich derhalben ist sye vngelas  
sen vñ ein luchnerin Niren ein vorbill von Abraham /  
dem got in seynen alden tagen / Isaac verhyesch vñ  
gab den welte Abraham auff gotis forderung / seinen  
schopffer / an vertzugk / willigklich wyder opffern vnd  
geben / vñ gotlichem willen recht geleben. Also saltu  
dich auch gegen got halden / vñ ym alles dastu hast /  
es sey leiplich oder geistlich wyderumb gebenn mit  
Job sprechende. Ich bin in mir selbst ploß vnd naket  
auff das erdtrich kömen / ich kan von mir nicht thun.  
aber goth hat mir sein gobe / geschenckt / goth hot mir

Job. 1



geben vnd genommenn / wye das got gefellig gewest /  
also ist es ergangen vnd bescheen / der nomen gots  
sey gebenedeyth. Wann der geist den salh vnd verlust  
gotlicher gnade empfind / so versenckt er sich vñ schreyt  
tzu got / Wie Daniel. O mein goth verlass mich nicht  
ewiglich.

Danielis. iij.

**D**ye bey merck das die eldern / fur ire kind in greus  
liche schwerth der feindenn lauffen. Das ich alhie  
fuglich tzusamen setzen vnd vergleychen mocht / dan  
heylige wercke / werden den kindern in der schrift ver  
gleichet. Was sal ich sagenn / wyr seinn von goth bes  
chaffen / vnd nit von vns selber. Nun sollenn wyr  
leyp vnd leben / von gotliches willen vnd eher wegen  
vergysen. Idoch wan wir vns selber in der veind hen  
den als ein geduldig lamb / geben sollen / vnd vns der  
todt ansprengt. Sagē wyr als die merterer. Ich hab  
in meynem auszganck gesprochen. Alle mensche seind  
sunder / oder wye dye Hebreysch warheit einheldeth.  
Ich hab in meiner synlossigkeit vnd do ich in vber  
messiger anfechtug stüdt gesacht / alle mensche seindt  
sunder / warumb / Ich solte goth mich gar mit vnbe  
schwerten gemut vnd freyhem willen opffern. Aber  
befind in mir dartzu bitterkeit / dye endstehet vō annē  
lichkeit / Du sprichst nach der natur / trawrig ist meyn  
seel bis in todt. O got ist es muglich. entlestige mich  
meyner noth. Aber der ernewet vnd gebessert gelaub  
haftig geist spricht. Nith geschee meinn wil / sonder  
deyner / wer den kampff / fryge / eintrag / yrsal vnd ein  
borung aufferlich nit beweist / als. S. Andres d spur  
reth doch innerlich / seiner naturen eygeschafft / das sie  
das ir suchet / Darumb wer begert das yme solchenn  
lugen von got nit tzyhen / in verlust der sal sein gebres  
chen bekennen.

psal. cxx.

Joan.



# In gotis namen faren wir Seyner genaden begeren wir.

1. Corin. xij.

Nymants magt sagen / Herr Jesu / oder in deynem namen / dan in dem heyligen geist / derhalben ist das bekennen. In deynem namenn faren wyr / ein werck gottis / vnd sein inhaldung / das wir von vnns selber tzu got gar nicht faren mugen / wye dan der spruch vnder den pferden vnd wagenn aussagt. Dartzu hastu clare vnderrichtung / das dem menschen verlyhen genad tzuwenig vnd vngnug / Darumb sal er sein hertz vnd kressen in goth auffwerffen / vnd seyner gnadenn meher begeren. Daraus volget / das die vngelartē einfeltige leyhen / eins hochern verstants seindt / dan dye gelarten vermischten Theologen. Es ist aber vorordent / dz got dye vnuerstendige vñ vnachtbare erwelet dy hochweyssen vnd namhaftigen tzu bescheynen.

1. Corin. i

## Nymants ist oberster gaben uehig Er sey dan in goth glerobig.

Dyser spruch ist / aus obertzeltē schriftē / so im crentz gemeldeth bewerth.

## Volgenn etzliche wortlein des vndersten wagen.

Dye vernym freuntlicher man / was eygenn wil kan / wye yn tzanckische disputirer / auffheben mit Heydnische lerer / den nimatz einsagē darf / er wolte dan dulde kettzerisch straff. Also ir disputation spricht. Unser wil mit freyhē werckē auszbricht / vñ ir substätz selber macht. Ist ad ymāts d' gottis wercke grosser acht / vñ



nit gestehet / das vns wil fur geet / der mus vor vnser  
schafft / so ym Aristoteles nit hilfft / als schne bey feu-  
er schmelztzē / vnd sich mit dem Credere beltzen. weyl  
wir auch nit dorffen das Credere flyhen / wollen wyr  
schafftē tzu vns tziehen. ¶ Jeremias / Kerent euch zu  
got schreyt. So kere ich tzu euch alle tzeit. David ges-  
hent tzum licht vnd werdet erleucht. Jacob mit wer-  
cken in gewisz beruffung fleucht. Paul⁹ sagt lauffent  
das er ergreufft / dar gegen einer pfeufft. Both macht  
tzucker / wercke / vnd erleuchtung / Mit schriften gley-  
cher meldung. Aber wir konnen wol distingwiren /  
vnd vns durch alle knodē furen. Exemplū Sine me  
nihil potestis facere / dz ist war perfecte / manichoati-  
ue lasse mi fare. Dyse selnd die vermengte Theologen  
sie vermuschē die schrifft mit soliger vnmesigkeit / das  
man vil meer heydnisch dan heylig biblischen lerenn  
in iren bochern vor augē liest. Wiewol gotlich schrifft  
rein vnuermuscht sein sal. als geschribē. elocia tua casta

psal. cxviii.

**Regir dich nach deinem höchsten  
So kumst du tzu dem besten.**

Etzliche sagen / das der mensch / nach seiner vernūfft  
die das hpcost vnd edelst ym menschen ist / leben sal /  
Aber Augustinus spricht das man nit seliglich lebet  
nach menschlicher vernunfft / sonder nach got / der dz  
aller hochst guth ist.

Aug. in li. res  
tra. i. col.

**Der hat ein sichern muth.  
Der so wil thut.  
Als er selbst kan wircken.  
Dan got musz ym hulff geben.**



Dyser spruch/ist verlecht/durh grunde/des reymenn  
anfahendē/got in vns schafft des oberste wage. Laß  
dich nith kominern/ab gleich her Eckins darwyder  
mit blossen wortten clappert/dan wir werden vnns/  
In lateinischer tungen also durchtzyhē/das man wol  
sehē wurt wec weit die Scholaster von d schrifft sein  
**So vernufft sünden betragt.**

**Vnd eygener wil veracht  
Machen sie leydt und rew**

**Von dem wasser wurst du neu**

Newheit stehet darin/das aus eynē sunder ein gerech-  
chter wurd. Vnd ir solt wissen/wie dyszer spruch vn-  
recht ist/dan wie wol vernufft etwan die sunde, ver-  
nymt/dannoch isz nit gnuch sonder gnad gotes/vnd  
ist alle rew vnd leyth vnnutz/das got nit eingibt/vnd  
von sich selbst macht. Die andere rewmē/wurd eyb-  
ygklicher/erwegen/vnd yren inhalt begreifen.

Nun mein freundlicher vnd gungstiger leser vnd ho-  
rer/du salt nymants verargenn/das man die heylige  
schrifft yn deutscher tungen furlecht/dan ich nit fin-  
den magk/dz vnbillich sey. So man prediget die hey-  
lige schrifft dewtsch. Auch ist sie allē Christglaubigē  
gemein/vnd weer seer fruchtbar/dz sie ygklicher/teg-  
lich yn seynē hausz lees od hort lesen. Wie Chryso-  
stom<sup>o</sup> sagt/es ist schant vn spot/dz ein handtwircker/sel-  
nen werckzeug nit hat/wie mach es dan/eln Chri-  
sten loblich sein/das er der heyligen schrifft mangelt.  
Ich geschweich das ymandt der recht weeg/yn dem  
er allein selig werden sal/verborchen ist/wyr habenn  
die sacrament yn gemein/vnd sollen die schrifft vn-



gemein haben. Es ist ein iamer vnd ellendt / das wyr  
Christglaubigen sein wollen / vnd sollen dye schrift /  
die vns den glaubenn / abmalt vnd außtrückt / yn  
schlaff vnd trawm handeln / vnd allein die rinden vñ  
scheluen groß machenn. Das geb ich alles menigkli-  
chem tzuerkennen / mich vleissigklich hiemit beuelhēt  
In sonderheit vnd beuor dem Edeln vnd ernuestenn  
Hern Degenhardt Pseffinger Erbmarschalh in ny-  
dern Bayern. Churfurstlichem Cammerer tzu Sas-  
chssen meynem gungstige gelibten Hern ꝛc. Datum  
wittenberg Montags nach Palmarū Anno. xix.



Faint, illegible text, likely bleed-through from the reverse side of the page. The text is arranged in approximately 10 lines.





Fi 3139

ULB Halle 3  
001 605 216




TA → OL

mt.











# Auszlegung vnd

Leuterung etzlicher heyligenn geschribten/So dem menschen dienstlich vnd erschieszlich seint zu Christlichem lebē. kurtz lich berurth vnd angetzeichēt in den figur vnd schribten der wagen.

## In sonderheit.

Des creutzes/tzu welchem vnser goth vnd herr /den menschen berufft.

## Bediengung vnd vorwort.

Romischer Christlicher Kirchen/wil ich in aller gutwilligkeit/alletzeit gewertig/gehorsam/vnd geuolgig sein. ¶ Lasse mich auch/ein kindt weyszenn. Doch lawts vnd inhalts heyliger schrefft. Der ich mich in eydes crafft verbunden/vnd mein pflicht/auff gemeindschafft vn gelupt Christlicher Sacramenten betewrt hab.

*von*  
*Andreas Samlhardt.*

*1519.*

